

東
華
續
錄

東華續錄

道光十五

臣王先謙敬編

臣周綱蕃恭校

道光七年丁亥春正月己卯諭昨因元旦朝賀禮成百官甫退有穿補服二人自東而西在太和門階下趨過降旨查詢本日據那清安等奏向來朝會有御史禮部司官侍衛等分列左右糾察失儀請將該員等察議等語朝會大典自應整齊嚴肅該員等於任意趨走之人竟不照例指拏所司何事並聞侍衛處久未派員自係相沿積習亦屬疏忽本應照例將該堂官懲處姑念由來已久並非起自近年著吏部查取此次專司越班失儀御史及禮部司員各職名照例察議嗣後丹墀南仍派禮部司員四人儀仗後仍派御史四人禮部司員四人並著添派侍衛四人分列昭德貞度

門內階下左右專司朝儀遇有越班行走者立即指拏奏辦儻再
怠忽從事定將各班堂官一併懲處不貸再向來朝鮮琉球諸國
俱列在西班百官之末蒙古合吉回子伯克在東班行禮者亦俱
參差不齊殊屬非是此後著理藩院派司官二人帶領另爲一班
或應在東班之末或原有一定制例著理藩院查明議奏並著護
軍統領於升殿前稽查彈壓一切隨從人等勿許溷入以肅朝儀
○丁亥張師誠以病免調朱桂楨爲倉場侍郎由署禮部左侍郎調○戊子
諭大學士九卿會同宗人府議奏遠支宗室仍入黃檔釐定章程
與覺羅分別辦理一摺朕詳加披閱非窒礙難行則有名無實甚
或苦樂不均集思廣益之意安在殊失朕望惟所議宗室親王郡
王貝勒貝子八分公等降襲至奉恩將軍世襲其職應予限制一
節著宗人府將如何遞降如何停襲軍功恩封者如何區別酌議

章程奏明辦理朕思宗派蕃衍人才輩出可否於在京文武各衙門及三旗侍衛中添設額缺或將滿洲員缺酌量撥改其宗室人員內有賢能出眾者每屆京察軍政年分據實保奏候朕量加簡用之處著原議王大臣等另行妥議具奏本日松筠因會議已經畫稿復有意見不同另摺陳奏自請交部議處著加恩寬免所奏擬將遠支宗室移駐吉林分給地畝招佃收租之處亦無庸議至於特旨交王大臣等會議之事自應虛心籌畫秉公商酌卽有意見不同之處亦當平心靜氣共同商議卽如此一事朕屢次試看負氣者有之退有後言者有之始同終異者有之凡此皆非公忠之道所以失朕望者在此嗣後王大臣等務要各抒忠誠實心任事不可苟且依違任性亂談以致惑人聽聞成何政體勿謂朕一槩不能覺察也懍之○調福珠隆阿爲湖北按察使興科爲江西

按察使○乙未諭琦善等奏覆查淮鹺積重情形據實陳奏一摺
前據張青選奏兩淮鹺務積重難返見在設法辦理並請將最爲
疲敝之淮北商人一律借給底馬以資辦運當以所奏未能明晰
飭交該督會同該鹽政逐款分晰陳奏茲據查明引積課懸商疲
運絀各情形淮北商人積疲已久復因連年運道梗阻鹽池被淹
成本虧折因乏誤運在該商等懸課未清自難再加調劑而岸鹽
攸關民食亦不得不量爲通融著照該鹽政前奏准其照從前借
馬成案一律借給底馬自請程之日起限六箇月完繳轆轤借給
如逾限不清卽將岸鹽封抵停其後借仍將該商究辦其從前借
馬未完之項仍照清查案內奏定章程分綱帶繳一俟商力稍紓
該督等當認真督辦不可徒託空言張青選曾任兩淮運司見旣
將准鹺致弊之由及如何補救之方探本窮源詳加考證如有應

行籌辦事宜著卽會同琦善逐細商籌妥議奏明辦理鄭祖琛係
初任運司一切情形未必如該鹽政熟悉不必俟該運司到任商
辦再行具奏也○丁酉長齡等奏上年張格爾滋事派賊目約霍
普等占踞和闐並僞封和闐王子等職經長齡等派今年班回至
阿克蘇之五品伯克伊敏前往查探該回眾因大兵雲集震懾天
威約會民人將賊首約霍普捏克托胡達及從賊阿布都克里本
等四名縛獻軍營並將附賊一百餘人全行擊斃復據阿布拉繳
到和闐大臣印信安設陣亡大臣官員牌位將七犯凌遲正法致
祭奏入獎賚有差○庚子以武忠額爲秦甯鎮總兵官松廷爲兵
部右侍郎由內閣學士遷○是月展賑江蘇高郵等二十三州縣衛軍民
兩淮丁谿等九場竈戶水災給安徽泗州五河縣及屯坐各衛奉
天白旗堡小黑山二處災歉口糧貸直隸開州等十州縣甘肅秦

州等十七州廳縣河南原武等四縣兩淮富安等五場江西蓮花等五廳縣災歉口糧籽種河南修武封邱二縣山西薩拉齊廳災民倉穀江蘇川沙廳等三營青村等八營銀米緩徵山東濮州等九州縣衛被災額賦湖北監利縣乞河廢田銀米

二月庚戌 上御經筵○甲寅 皇次子奕綱薨○庚申撥浙離

商捐銀一百萬兩備回疆軍需○癸亥以福申爲內閣學士兼禮

部侍郎銜

由左副都御史遷

○壬申論據長齡等奏籌定大兵由樹窩子

一路合力進剿並酌辦後路一切事宜一摺烏什赴巴爾昌一帶既多戈壁水草缺乏卡外各布嚕特又皆蹤迹詭譎恐奇兵深入或有牽制該將軍等議定統領大兵於二月初六日徑由樹窩子一路分爲前敵後應突往圍攻所見甚是行軍之道移步換形原在該將軍等審勢相機妥辦務保萬全惟兵貴神速必須掩其不

備剋日圍攻既足以振軍聲而褫賊魄且使逆裔無竄逸之暇方
爲妥善布嚕特等雖與逆裔聲勢相通見在兵威大振自各心存
震懾臨時相機招致定可爲我堵禦黑帽回子因受張格爾荼毒
已有分類之勢見發檄諭令其糾約族類設法擒集固是有隙可
乘第恐回性反覆無常見雖情詞真切未必悉能實心效順尙須
密加防範如果能將張格爾縛獻前來自當照懸格懋加封賞此
時大兵進發所過附近從逆各回莊如尙敢負固不服卽須順道
勦洗廓清後路庶兵行糧運俱無阻滯此時計已到喀什噶爾卽
當併力進攻設法兜擒並將大小卡倫僻路豫爲堵禦斷不可使
張格爾戰敗逃遁或有外援賊匪尤當先行相機勦禦總趁这天
日融和於三四月閒一鼓蕺功方爲不負委任朕日日叩祝上
蒼加佑兵行順利佇望捷音之至也此後大兵進勦情形自當隨

時馳奏即使無事軍情每屆七八日亦須將軍中見辦事宜奏報一次至遲總不得過十日以慰宵旰殷盼昨據鄂山盧坤奏共解阿克蘇大營兵餉銀二百三十八萬餘兩俱已起解在途運糧駝隻亦俱全行出關見復降旨飭催餉銀兵精自可源源接濟其粵東兩淮兩浙報效三百餘萬兩前亦飭諭該督撫等迅速解甘備用○甲戌 上詔 黑龍潭祈雨○是月貸江蘇狼山等三營毗連災區兵餉緩徵江蘇海州等十三州縣衛通賦

三月庚辰兩江總督琦善等奏減工啓放正河掣溜通暢兩壩趕緊鑲築即可合龍得旨所奏俱悉尤當倍加愼勉永慶平成也又奏見在黃水落低已飭廳營將禦黃壩啓放催挽重運軍船迅速渡黃得旨禦壩已啓瀆行順利朕心深爲嘉慰○丁亥 上親耕藉田○已丑諭軍機大臣等據琦善等奏開放禦壩正在趨渡軍

船適遇黃水斗長尺餘漸有倒漾暫堵禦壩數日又復疊長三尺餘寸等語前據該督等奏正河開放黃水奪溜東趨極爲暢順何以甫開禦壩兩日渡船僅四百餘隻輒又斗長尺餘數日之間疊長三尺餘寸竟致倒漾雖係桃汛屆期究是下游新河不能暢順所致據奏關孟兩灘逢灣取直之處老淤膠結急切不能刷寬長河至此一束落少長多挑挖未能實在深通此次興舉大工需費甚鉅原期河湖復舊一勞永逸乃減壩甫於初三日挂纜合龍而黃水斗長復高於清致漕船不能趲渡該督等所辦何事黃流水過沙停若一處稍不暢順則節節淤墊堪虞儻經此一番工作新河輒又停淤豈非前功盡棄數百萬帑金竟成虛擲而數郡居民迄未奠安漕船仍前阻隔該督等自問當得何罪見在軍船陸續過淮琦善等總當設法籌辦務使本年重運全數趲渡北上斷不

准稍有延誤並將黃水斗漲情形細心體察是否旋長旋消抑係長速消遲或止關孟兩灘新河未能刷寬抑竟別有阻滯之處詳加履勘妥爲籌辦總之漕船北上斷不容不啓壩放行新河挑工斷不容復行淤墊著將見在如何辦理並軍船渡黃幫數迅速由驛具奏○庚寅諭阿揚阿奏蘆東各商情殷報效一摺長蘆山東商人因回疆大兵進剿籲懇捐備賞需銀四十萬兩分限完納具見忱惓惟該商等繁稱疲乏非他省可比所請蘆商捐銀三十萬兩東商捐銀十萬兩之處著不准行○癸巳諭本日正白旗將慶祥長子文輝帶領引見慶祥在喀什噶爾參贊大臣任內已逾半載並未將逆裔探訪明確以致勾結煽亂辦理雖未妥協惟念賊匪圍攻喀什噶爾慶祥嬰城固守將及七十日殺死賊匪萬數千人迨該逆竄通地道進城復能率兵巷戰因道遠援兵不至力竭

自盡實堪憐憫文輝前已降旨承襲一等公兼一雲騎尉著加恩
賞給散秩大臣在乾清門侍衛上行走其次子文焜年尙幼穉俟
年屆十六歲時著該旗帶領引見○甲午命病痊前任福建按察
使舒靈阿以四品京堂候補○丙申長齡等奏張格爾因大兵進
剿派其賊目糾結賊匪聲言五萬人在洋阿爾巴特地方迎拒官
兵並派賊數千於大兵紮營後乘夜前來潛襲我兵槍礮齊發賊
始竄逸長齡等督率將領官兵於次日進發賊匪排列沙岡抗拒
官兵分路撲殺賊眾潰敗逃竄長齡督兵由中路追殺楊遇春武
隆阿跟追竄賊三十餘里統計殺賊萬餘名生擒活賊三千二百
餘名奪獲軍器馬匹牛羊無算奏入晉長齡太子太保予楊遇春
武隆阿優敘均賞賚有差○丁酉上詣黑龍潭祈雨○戊戌
諭琦善等奏禦壩驟難啓放見將漕船倒塘灌運並自請從重治

罪各一摺前因黃流淤墊糧運阻滯經該督等籌議啓放減壩挑
濬正河朕不惜數百萬帑金俯允照估興辦原期河湖漸復舊規
漕運永臻暢順爲一勞永逸之計節經敕諭該督等通盤籌畫加
慎加勉毋致稍貽後患該督等自稱再三熟商並非全無把握嗣
經逐段估挑完竣啓除河頭攔壩黃水奮迅湧注閱七時之間駛
行二百餘里溜勢極爲通暢本月初一初二兩日催渡幫船四百
三十餘隻初三日堵合減壩黃水倒漾復將禦黃壩封閉茲據奏
酌辦倒塘灌放之法復提進幫船五百五六十隻見已渡黃二百
六十隻是此次興辦大工仍不能掣水通漕該督等實難辭咎其
所奏挑汎漲旺黃水日見擡高何以開放減壩以來皆係清高於
黃甫經放河適遇黃水斗長至關孟兩灘挑切膠淤驟難刷塌該
督等又並未豫爲籌計縱使本年重運均可北來而河底未能深

通將來又費周章數百萬帑金竟成虛擲若將該督等立予罷斥重治其罪轉得置身事外其何以專責成琦善著拔去花翎張井降爲三品頂帶潘錫恩降爲四品頂帶姑示薄懲令其戴罪自贖所有倒塘灌放各費卽著落該督等按成賠補不准開銷該督等亟宜相機設法悉心妥辦務於大汛以前將重運埽數渡黃其河湖大局必須籌度萬全斷不得稍有疏失儻漕運仍復遲滯河工或致壅潰必將該督等從重治罪決不寬貸○諭軍機大臣等寄諭兩江總督琦善等前因禦黃壩日久堵閉運道不通盤壩剝運旣非經久之策海運亦止可偶一試行經該督等會同熟商始定議開放減壩挑挖正河以期掣溜通漕河湖復舊爲一勞永逸之計前經飭諭該督等挑竣後不能先引清水刷滌將來挽歸故道恐爲時無幾又將梗阻如故務須籌畫萬全經理妥善斷不准復

有貽誤昨據奏挑工全竣啓除攔堰黃水奮迅湧注登時掣溜七分落低二尺六寸七時之間行二百餘里溜勢極爲暢達卽可剋期堵合減壩朕以該督等相機辦理自必確有把握乃續奏減壩堵合適值桃汛經臨黃水斗長本日又據奏稱實由關孟二灘取直處所膠土壁立不能隨溜塌寬水勢阻遏致大溜旁穿土山仍循南北兩岸舊埽而行土山亦漫塌入河開段淺阻等語桃汛屆期該督等原應豫計切灘處旣知膠土壁立亦應將猝難刷塌之處豫爲籌及儻挑切稍有未妥何難將攔堰暫緩啓除減壩暫緩堵合乃正河挽復之後黃水斗長四尺六寸轉不若減壩未堵尙能掣溜通溜又踵前弊引黃濟運數百萬帑金已成虛擲將來貽患豈可復言且據奏洪湖存水一丈四尺餘寸一經淮水漲發尙須開昭關等壩洩清若使減壩不堵黃水分洩當不至此汝三人

俱無可辭咎其趕堵減壩究係何人主見著據實具奏汝等請開
減壩原爲洩黃今並無成效依然倒灌轉思洩放清水不顧淮揚
之復被淹浸試問有此辦法耶見在下游壅遏究止關孟切灘新
河一處抑此外尙有阻滯處所總須勘明致病之由速籌補救之
策其下段停沙又復淤墊若干應如何疏治務卽妥爲籌辦儻大
汛經臨再有阻遏致上游兩岸隄工稍有疏失將汝三人從重治
罪固所當然但如國事何至重運漕船見已連檣抵壩旣議倒壩
灌運姑聽權宜辦理務令及早全數北上按五日奏報一次如有
遲誤惟該督等是問○予國初遇賊不屈通判劉廷標後裔恩騎
尉世職○己亥諭長齡等奏官兵續獲勝仗一摺覽奏欣悅之至
逆裔張格爾自洋阿爾巴特被大兵痛勦復糾約十餘萬賊匪於
沙布都爾莊外臨渠排列並決水壑坎用馬衝突仍據險施放槍

礮我兵用連環槍礮轟斃甚多仍敢撲渠下壓我兵奮勇搶上飛渡渠水短兵相接長齡等復派馬隊由左右淺渠鈔擊賊匪難支安集延大頭目色提巴爾第猶擊鼓馳騁死力抗拒該將軍等督令馬隊橫截入陣衝作數段槍箭如雨馬甲貝洪阿箭斃色提巴爾第馬甲圖明阿奪獲賊馬鳥槍鐵甲賊始潰散長齡等復派員督催各路滿漢馬步兵分投掩殺偪至渾水河邊趕勦二三十里殘匪都盡突有援賊數千自西北林來復經楊遇春等趕往迎勦斃賊千數百名餘眾紛竄河西有馬步賊匪二千名擁橋策應官兵用大礮轟擊賊始潰竄統計擒戮賊匪不下四五萬人奪獲槍礮器械馬匹無算並於首級中認出回子大頭目素丕卡克安集延頭目占巴克等俱已戮斃該將軍等懋著勛勤實堪嘉獎長齡著賞給白玉吉祥如意牌一面珠鑲寶石帶版一副白玉鼻煙

壹一箇鑲寶石小刀一把楊遇春武隆阿俱著賞給白玉帶鉤各一副白玉鼻煙壺各一箇嵌銀絲小刀各一把該將軍參贊前經降旨優敘此次著加恩交部從優議敘馬甲貝洪阿圖明阿並著賞戴藍翎此次打仗奮勇以及傷亡官兵卽查明同上次出力員弁兵丁等一併具奏候朕施恩○諭軍機大臣等本日長齡等奏官兵續獲勝仗一摺已明降諭旨分別加恩矣長齡等督率滿漢官兵兩次接仗擒戮賊匪事機甚爲順利自可迅奏膚功該逆裔見於回莊內糾約二三十萬人十五歲以上均已派出不願者卽行殺戮暴虐已極眾心自必怨恨計該將軍等必當乘此機會就近招致諭以爾等被賊脅從無辜受戮不如相約效順縛獻首逆卽可懋膺封賞據奏黑帽回子見俱聞風歸順令其糾約回眾擒渠截剿所辦俱合機宜至張逆見在喀什噶爾湊集男婦大小四

五十萬人防堵此等烏合之眾正可聚而殲旃且該逆負隅固守
攻圍尤易得手止須堵截該逆竄路此時計已就擒佇望捷音迅
至○命蔣攸銑穆彰阿馳往江南查勘南河○壬寅以張麟署禮
部右侍郎由內閣學士署惠顯爲左副都御史由太僕寺卿遷○癸卯以惠顯爲
駐藏辦事大臣保昌署左副都御史由光祿寺卿遷○甲辰雨○乙巳諭
軍機大臣等琦善等奏首進軍船二十四幫全數渡黃並二進等
幫船隻跟舢打放一招倒塘灌放軍船原因禦黃壩復行堵閉姑
聽該督等權宜辦理見雖將首進軍船全數挽渡而在後各幫陸
續抵壩務須跟接催提連檣挽運不許稍有延滯據奏黃水較前
又落七寸此後如能再爲消落總以啓壩放行爲妥該督等當隨
時察看水勢妥籌辦理固不可使漕艘脫幫亦不得使河湖淤墊
受敝也○是月展賑江蘇高郵等州縣災民貸甘肅張掖等三縣

直隸開州等六州縣貧民口糧

夏四月丙午朔日有食之○丁未諭本日據大學士九卿會同宗人府議奏宗室添設額缺一摺宗室人員自嘉慶初年以來節經增添額缺登進之途尙無擁擠惟各衙門文職俱有定額八旗人員爲數更多各班已形擁擠未便更張致礙銓法至各旗營參領等官缺出宗室與八旗人員一體升轉向無宗室專缺更難議添所有宗室文武各官俱仍著照舊章辦理其議添侍衛一條雖有增益改撥於額缺仍符舊制即可廣宗室登進之路仍無礙滿洲升途著照所請三等侍衛六十三員內有世職章京不兼侍衛章京什長及不在乾清門上駟院行走者無論係應封軍政時引見賞授之員皆作爲額外侍衛所遺三等侍衛員缺暫行存記俟挑選之年揀選補放以足六十三員之數其額外侍衛原食世職章

京之俸業經改爲額外無庸另給馬銀豆石以節糜費遇有應升之缺仍准其一體升用其黏桿處三等侍衛原設十五缺嗣後每旗添設二缺共爲二十一缺該處每旗撥出二缺作爲宗室專缺俟出有二缺後至第三缺時補放宗室人員俟補足六缺後卽爲宗室額缺隨時挑取遇有該處升缺仍與十五缺人員一體揀選升用如遇侍衛升等之年著與大門行走者一體揀選軍政年分統計各項侍衛如已逾一百二十員之數卽保舉二員儻人數不敷仍保舉一員以昭覈實松筠另摺奏請於六部理藩院添設宗室郎中員外郎主事額外主事共二十八員從前嘉慶年間業於宗人府額設司官十六員之外又於六部理藩院增添司官十六員已不爲少今再議增二十八員事多格礙難行著無庸議其宗人府奏考封襲封之舉恩將軍承襲次數及烏爾恭阿另行具奏

各一招除奉恩將軍內有承祭盛京三陵以及本支內別無世職者仍照舊准其世襲罔替外凡恩封初封降襲至奉恩將軍均襲至三次而止軍功世爵世職嫡派子孫既世襲罔替其旁支子孫襲封考封至奉恩將軍著加恩襲至五次而止以示區別而歸舊一○戊申諭長齡等奏官兵三獲勝仗一摺覽奏欣悅之至賊匪自沙布都爾莊痛勦後膽敢糾合餘燼在阿克瓦巴特回莊派賊眾十餘萬負隅抗拒經長齡等先派哈琅阿阿勒罕保等左右兜勦賊匪在岡上排列形如雁翅長齡等卽督提鎮領隊等率領馬步分爲兩翼一鼓齊進賊據險迎拒我兵奮勇搶撲槍礮兼施賊眾佯退卽令步兵用連環槍礮乘風施放噴筒該賊匪馬隊冒火突煙死力衝壓長齡等復令虎衣虎帽民遣躍舞藤牌賊馬驚陣亂突有紅衣賊目率領埋伏援應哈琅阿等所帶官兵從莊後

掩殺賊勢不支紛紛奔竄大兵搶過沙岡分投趕殺斃賊二三萬
眾生擒二千餘名於賊屍中認出安集延大頭目阿瓦子邁瑪底
那爾巴特阿渾奪獲馬匹槍礮器械無算追至洋達瑪河四散逃
竄隨將沿河一帶回莊匪徒接剿淨盡該將軍等懋著勳勤深堪
嘉獎長齡著加恩先賞紫韁楊遇春著加恩晉太子太保銜武隆
阿著加恩賞加太子少保銜指日埽穴擒渠朕再渥沛殊恩用酬
勳績並發去四喜玉搬指十箇玉柄小刀二十把火鐮十把著分
賞出力將弁○王子諭軍機大臣等長齡等奏大兵克復喀什噶
爾擒獲賊目逆裔張格爾已乘閒竄逸見分兵追捕一摺大兵自
進剿以來連獲勝仗數日之間乘勝進攻茲復竭兩晝夜之力克
復喀什噶爾實爲迅速可嘉該將軍等鼓勇直前將士人人效命
固堪嘉獎惟張逆勢窮竄逸久在朕意料之中屢經飭諭長齡等

設法堵截防其潛遁不啻至再至三乃大兵已臨城下功在垂成猶任逆裔乘閒竄逸覽奏實深痛恨殊失朕望據活賊供稱卡倫以外見有黑帽回子堵截霍罕又與該逆不睦不敢竄往因逃赴英吉沙爾葉爾羌苟延殘喘賊情詭譎均不可盡信並恐逆賊聲言他往爲緩我追兵之計見獲賊甚多逐細向其嚴究當可得逆酋實在蹤迹此時既有該逆帶領騎賊竄逸之供其非臨陣殲斃可知該將軍等分兵追捕當已布置周妥總須將張逆設法擒拏務在必獲或直逃往英吉沙爾葉爾羌抑或竟逸卡外務卽嚴密兜截迅速掩捕毋得再任遠颺尤當據實奏聞見雖安撫黑帽回子於卡外截拏張逆恐尙未能得力必當嚴行檄諭霍罕及布魯特一體效順擒渠照格封賞如竟敢縱匿卽當移兵進剿想該將軍等已計畫施行若此番與師致討僅擒一二逆裔家屬卽可塞

責豈非徒勞師旅虛糜帑項該將軍等屢承諄諭將來何顏見朕
見在長齡留駐喀什噶爾帶兵若干楊遇春武隆阿向英吉沙爾
葉爾羌進剿帶兵若干兵以分而見單總應隨時隨地體察情形
相機調度如此時喀什噶爾賊勢尙眾須用重兵鎮撫該參贊等
卽當酌分兵力留助長齡儻英吉沙爾葉爾羌兩處軍情緊要喀
什噶爾無須多兵駐守卽將得力將領官兵酌調前往隨同該參
贊等勦捕務期聲氣相通加意慎重毋致墮賊奸計至張格爾之
妻前有拘禁霍罕之說今愛則爾畢比等三口是否係其原妻抑
進卡後始行招納務須根究明確如是其原妻卽行解京若止隨
時擄掠該將軍等訊明卽在該處正法儻已起解在途亦卽酌量
前途地方知會該處就地辦理其巴布頂之子阿里雅罕仍卽派
委委員解京毋稍疏懈尋奏前獲張逆之妻愛則爾畢比等三口

查均係進卡後招納見已正法巴布頂之子阿里雅罕見委副都
統容安小心押解進京報聞○甲寅諭軍機大臣等據琦善等奏
截至四月初三日共挽渡軍船二千二百四十一隻北運口楊莊
頭壩見將兩壩頭拆展外北臨黃浦家莊東西兩岸築作托清蓋
黃等壩並將臨黃土攔壩兩壩頭鑲護鉗束清水水勢見尙深通
足資浮送等語頭二進軍船見雖挽過二千二百餘隻惟黃水消
長情形未據奏及想來仍未落低轉瞬大汛經臨水勢有長無消
不特在後江廣幫船趨渡費力而南北兩岸隄工在在喫重本日
據嚴烺奏報桃汛安瀾摺內據稱本年桃汛長水無多而所存底
水較上年大至一二尺測量河身比凌汛淤墊尺餘是下壅上潰
之弊不可不早爲慮及見在關孟兩灘壅滯之處亟應設法濬治
琦善等接奉前旨自己詳勘籌辦蔣攸銛等到彼卽將伊等籌商

辦理及下游阻遏情形據實具奏並責成該督等將在後江廣幫船跟接打放總於汎水漲發以前迅催趲渡毋使一幫留滯將來回空南下亦須豫飭妥籌務令剋期歸次不可臨時稍有遲延致誤明歲漕運其大汎防守事宜必應倍加慎重妥爲防範若關孟兩灘及下游淤墊處所仍不能及早疏導致水勢壅遏上游兩岸隄工稍有疏虞該督等豈能復邀寬貸勿謂朕言之不豫也○乙卯兩江總督琦善等奏敬陳感悚戴罪自贖得旨大汎以前漕船務要渡竣全河務保安瀾回空不可遲滯三者有一不妥爾等自問當得何罪懷之又懷○己未諭軍機大臣等本日據琦善等奏春汎長水情形並稱起堵減壩實係公同籌畫並非一人主見惟關孟兩灘老淤膠結未能刷寬緣與估時輕聽睢南同知唐文潯勘估錯謬見經張井親查長河中泓深淺不一溜勢有行新河者

有超舊河者關家灘則新河淤淺舊河反深孟家灘則新河甚深
舊河較淺詢之兵弁居民皆稱旬日以來溜勢已見暢順若遇大
汛必能刷出正泓漸臻深暢見將淺阻處所設法疏濬並將兩岸
隄工加高培厚備禦大汛等語該督等於估挑事宜全未經歷卽
應博採眾論何得輕聽唐文濬一人之言致誤要工已明降諭旨
將該同知革去頂帶留工以觀後效該督等尤當倍加愧勵勉圖
自贖見在漕船已渡黃者計二千九百六十隻總期大汛以前全
數渡竣全河務保安瀾回空不致阻滯三者均不許稍有貽誤若
果如琦善等所奏大汛經臨刷出正泓可期深暢尙可量加寬恕
如有他虞朕惟執法嚴懲決不稍貸看該督等辦理如何耳蔣攸
銑等計已到彼著親赴關孟兩灘查閱新河舊河情形是否與琦
善等所奏相符並將見在疏濬情形據實具奏○辛酉諭上年逆

裔張格爾滋事朕特命長齡楊遇春武隆阿馳往回疆督辦萬里之外調兵轉餉閱時既久始克會齊進剿朕以天戈所指各城無難剋期收復惟張逆係元惡大憝必應設法殲擒以彰天討而靖邊圉節降諭旨令長齡等同心合力奇正分途總須布置周密毋任竄逸申諭不啻至再至三本年該將軍等由洋阿爾巴特進剿每獲勝仗無不立沛恩施並屢頒賞件俾共知奮勵迅獲渠魁前據奏大兵克復喀什噶爾張逆已先期乘閒竄逸方冀數日之間即可追擒蕝事乃本日馳報官軍收復英吉沙爾張逆尙無實在蹤迹長齡等未能仰體朕宵旰憂勤之意致有疏縱辦理不善自應加以懲創長齡著革去紫韁楊遇春著革去太子太保銜仍留太子少保銜武隆阿著撤去太子少保銜朕賞罰一秉大公該將軍等如能迅速擒渠永杜後患仍當格外施恩懋膺重賞儻竟任

該逆遠颺僅以殲獲賊目收復城池草率塞責則是老師糜餉大負朕望惟該將軍等是問楊遇春之子楊國佐武隆阿之子慶安隨營出力此次本應加恩惟首逆既未就擒無庸遽加升秩其所請桂成固英阿開復侍衛之處桂成著賞給三等侍衛固英阿著賞給藍翎侍衛俱在大門上行走原任漕標副將緣事降爲千總之滿德坤著加恩以都司補用巴哈布之子監生扎爾漢著加恩賞給筆帖式其餘單開保奏官弁兵丁著長齡等覈敘確實功績奏到時再降諭旨○諭軍機大臣等長齡等由六百里加緊奏報朕以爲必係擒獲張逆飛章告捷或探有實在下落乃披閱奏摺係克復英吉沙爾並馳赴葉爾羌查拏張逆情形仍未知該逆下落殊失朕望張格爾小醜跳梁戕害官弁竊踞城池是以命將出師聲罪致討節經降旨令該將軍等設法兜擒出奇制勝並頒發

殊諭勿令該逆免脫或臨陣殲之或圍困誅之若能生致尤非常之功該將軍等接閱後豈竟毫不記憶耶逆回不過烏合之眾本無紀律喀什噶爾等四城何難克復朕所日夕廬念者在擒獲首逆耳節據該將軍等奏到洋阿爾巴特等三戰捷音無不立沛恩施並屢頒賞件將軍自富布置周密分兵兜截出其不意斷其去路一鼓殲擒以彰天討以副委任且朕面諭武隆阿是何等語言無微不至乃並不斟酌輕重一味迎頭攻擊坐失機宜致令該逆聞風潛竄將軍等所謂謀而後進者安在辦理不善咎實難辭再歷次頒發諭旨將軍等上年尙有覆奏數月以來並未一字提及亦屬含混殊不可解已明降諭旨將長齡等前賞紫韁宮銜分別撤去用示薄懲儆知愧知懼速將該逆擒獲仍當格外施恩如竟不獲該將軍等自問可稱蔽功否至所奏將葉爾羌截定卽當帶

兵出卡確查張逆所在專力跟蹤追捕等語將獲之時尙且令其逃匿卡外追捕未見必得且路徑荒遠提兵深入恐卡外各部落轉致驚疑擾亂別滋弊端所關甚大況未知張逆下落又將從何處出卡據奏各布魯特沖巴噶什奈曼岳瓦什等送回邁瑪薩依特家屬情形尙屬恭順惟當趁此機會查明該逆逃竄處所整軍揚武忱以兵威示以恩信並遣人招諭各部落及霍罕等處一體擒獻遵前旨照格封賞令其懷德畏威以期必得庶此一舉不虛見在逆酋未獲原無可施恩之處姑念將弁兵丁同一盡力尙可量予獎勵惟所奏打仗出力德勝額等各員並未聲敘如何出力之處著將各大員確實功績簡明摘敘候朕施恩至請賞藍翎之千總朱成貴等至六百十八員之多未免太濫著該將軍等覈實刪減奏到時再降諭旨將此由六百里加緊加快諭令知之○甲

子諭長齡等奏官兵收復葉爾羌一摺此次楊遇春等由英吉沙爾進攻葉爾羌先派頭等侍衛阿布都爾滿前赴該城查探情形大兵行至倭巴地方據阿布都爾滿帶領該城大小阿渾伯克迎接投誠並縛賊目烏舒爾巴凱等十一名拏獲逆賊一百六十餘名交出軍火馬匹無數經楊遇春等妥爲收撫派兵彈壓將從逆匪黨分別凌遲致祭忠魂並檄諭各部落訪拏張逆所辦俱屬妥協阿布都爾滿上年隨營出力經朕節次施恩賞授頭等侍衛二品頂帶此次收復葉爾羌不煩兵力尤昭偉績著加恩授爲散秩大臣署理葉爾羌阿奇木事務以示獎勵阿布都爾滿係郡王銜貝勒哈迪爾之姪伊一門世篤忠貞洵堪嘉尙哈迪爾著加恩授爲內大臣伊精力尙健仍著照舊供職用示朕眷念舊臣推恩無已至意○乙丑晉封靜嬪博爾濟吉特氏爲 靜妃○丙寅諭琦

善等奏重運軍船全數渡黃一摺本年南糧軍船先由禦黃壩挽
渡四百三十餘隻因黃水斗高復堵禦黃壩倒塘灌放陸續渡黃
二千一百餘隻尙有五百五十餘隻未渡適值黃水落低該督等
照常啓放禦壩催提趙渡於四月二十二日全數完竣未逾原限
該督等前此籌辦未能周妥原有應得之咎惟念該委員等自倒
塘以來催趙照料及啓閉各事尙爲迅速不得因該督等辦理不
善致沒微勞著琦善等擇其尤爲出力者酌保數員奏請施恩不
准冒濫見在禦壩既啓大汛未來該督等當趁此機會務令清水
暢出將下游淤滯處所刷滌深通以冀河湖順軌安瀾稍贖前愆
○乙亥張麟丁憂以韓鼎晉署禮部右侍郎病痊○是月緩徵
直隸開州等十州縣逋賦

五月丙子朔以顏伯燾爲甘肅布政使林則徐爲陝西按察使

按察

○庚辰諭長齡等奏和闐克復西四城全經戡定一摺和闐

卷之十五

七

回服前已將賊首約霍普等縛獻投誠逆裔張格爾復差賊目噶爾勒玉努斯帶領安集延並情蘭回子一千五百人在彼盤踞將迎候官兵之阿渾穆圖巴拉父子及回子伊斯瑪依爾等一併殺害又糾約該處無賴回子三千餘人抵死抗拒官兵經提督楊芳等帶兵前往勦辦探得毗拉滿地方有賊數千隨即整隊前進迎見賊匪排陣擊鼓施放槍礮直前拒敵楊芳等帶領馬步隊迎勦並合兵潛由北面沙山馳鈔賊後四路夾擊見有手執紅旗身穿花衣之騎馬賊目指揮其閒馳取死戰我兵奮勇衝殺賊勢業已難支忽於東南沙山後突出執旗賊目帶領馬賊五六百名飛驟前來槍矢交加刀矛相接吉林佐領富爾松阿等帶兵衝入賊陣兵丁田興起被賊砍傷左額富爾松阿韓國彥等將花衣賊目噶

爾勒擒獲官兵乘勢力撲賊眾潰亂奔逃趕殺二十餘里斬賊二千三百餘名生擒一千餘名奪獲駝位刀槍火藥無數乘勝直前卽有舊時伯克等帶領回眾千餘人迎接官兵入城和闐全復楊芳前此隨同長齡等連獲勝仗已著勞績此次專派帶兵收復和闐復能籌畫周妥因賊匪直前拒敵分兵鈔入賊後四路夾擊使賊目不及逃竄登時就擒實屬調度有方深堪嘉獎楊芳及領隊哈喇阿阿勒罕保著加賞白玉翎管各一箇四喜白玉搬指各一箇小刀各一把阿勒罕保余步雲著加賞白玉翎管各一箇玉搬指各一箇小刀各一把以示獎勵其拏獲賊目噶爾勒之佐領富爾松阿把總韓國彥等究係何人首功著該將軍等確查具奏候朕施恩兵丁田興起因衝入賊陣至彼砍傷並著查明該兵丁受傷輕重一併具奏○壬午陸以莊以病免以王引之爲工部尙書

潘世恩爲吏部左侍郎候補○癸未諭蔣攸銛等奏查明黃水下

侍郎

流切灘阻遏情形一摺前因南河堵合減壩黃水倒漾復將禦黃

壩封閉經朕特派蔣攸銛等前往江南將關孟兩灘新舊河詳細
察看並令親往高家堰周歷履勘茲據奏稱清黃相爲表裏因南
岸黃水節次漫口湖早受淤堰工愈形喫重前年高堰石工坍塌
因迫於時日搆估趕辦年年保固賠修仍係入水摸砌見在加築
後戩土工亦難深恃該督等因清水不能敵黃止有落低黃河一
法請開減壩騰出正河一律挑挖下游山安海防兩廳所屬關孟
兩灘俱係膠淤該督等泥於逢灣取直成法並輕聽睢南同知唐
文濬兩灘並挑之說決意估辦而河自十數里外已有迅激斜注
埽灣之勢乃從埽上攔截另挑取直以舊河寬百餘丈至二百七
八十丈之水欲迫而納諸僅寬二十餘丈膠淤之地不能塌寬轉

成倒漾迨拆去灘際之攔黃壩堰大溜始順歸舊河見用沙船往來疏濬可望深通難期速效等語琦善等急於奏功泥於師古並未博採眾論輕聽唐文濬一人之言不加詳察以致數百萬帑金竟成虛擲咎無可辭琦善前已降旨拔去花翎張井潘錫恩分別遞降頂帶仍著一併交部嚴加議處見在漕船全數北上所有倒塘各費已著落琦善等分賠轉瞬伏秋大汛仍責成該督等虛衷商榷竭力補救督飭道將廳營加意防範其堰圩各工時加保護並本年回空軍船及早歸次儻有疏虞阻滯朕惟琦善等三人是問在工人員除鹽道德啓並未督同估工著無庸議外同知唐文濬狃於從前節次辦法輕率債事糜帑殃民非尋常錯誤可比蔣攸銛等請將該同知革職留工效力不足蔽辜唐文濬著革職再枷號一箇月滿日發往伊犁充當苦差淮揚道鄒錫澣淮海道羅

琦未將工段難易通盤詳酌致河弁有未能完工情急自盡情事雖無剋減情弊實屬辦理失當鄒錫道羅琦俱著交部議處○丙戌諭前因河湖交敞經琦善等再三熟商始定啓放王營舊減壩之議據奏挑挖正河引清刷濬將來挽復故道既可掣溜通漕而河身亦可日漸深通並稱遲至八九月閒啓壩彼時秋稼登場小民更可無虞失所朕以該督等旣爲此奏自必確有把握是以不惜帑金不爲遙制悉照所議辦理乃始因湖水異漲大啓閘壩宣洩迫宣洩不暢趕開減壩以爲迅啓禦壩暢洩湖漲之計致下游州縣田廬俱被淹浸居民蕩析已屬辦理不善然果能一舉收效尙當權利害之輕重不復深費及至本年堵閉減壩而黃河仍未消落運道依舊不通並將下游挑工前功盡棄是不但將數百萬帑金輕付一擲且使數州縣生靈徒受災浸流離遷徙該督等議

舉大工不知集思廣益輕聽唐文濬一人謬論致誤事機糜帑殃民莫此爲甚使該督等捫心自問尙有何顏對數百萬災黎耶茲經吏部議將琦善等照溺職例革職本應悉照部議卽予褫革姑念琦善平日辦事尙屬認真在山東巡撫任內頗知整頓河務本係兼轄著卽開缺加恩降爲二品頂帶來京另候簡用張井潘錫恩專司河務種種貽誤其咎更重惟此時若遽將伊等罷斥轉得置身事外豈反令他人代爲補救乎張井潘錫恩俱著革去頂帶仍留河督之任以觀後效此係格外加恩俾令戴罪自贖若果能激發天良於伏秋大汛經臨全河悉保安瀾今歲回空明年重運均能無阻尙可稍贖前愆儻河湖運道稍有疏虞必當從重治罪決不寬貸其議降三級調用之淮揚道鄒錫洎淮海道羅琦俱著加恩改爲降四級留任不准抵銷○以蔣攸銍爲兩江總督○丁

亥命穆彰阿在軍機大臣上學習行走○己丑調奕經爲工部左侍郎奎照爲兵部左侍郎○以申啓賢爲內閣學士兼禮部侍郎銜降調倉○辛卯諭軍機大臣等本日長齡等由六百里加緊馳遞奏摺朕以爲必係拏獲張逆或得該逆切實下落相機督捕乃披閱摺片僅係帶兵出卡捕逆情形一派空言覽奏實深憤懣安集延布噶爾係該逆遁迹之藪其次則汰劣克阿坦台爲該逆黨與長齡俱所稔知前此早應籌及何待今日如夢方醒而爲此敷衍塞責耶長齡自到軍營節經降旨勿令張逆逃出卡外不啻至再至三乃張逆於三月初一日從數十騎遁去距四月二十二日發摺時已五十餘日該逆雖如鬼如蛾何至毫無蹤影該將軍等所辦何事汰劣克阿坦台伊里斯滿底等斷無不知該逆下落之理惟汰劣克阿坦台曾經從逆明知其逃匿之所或未必卽肯吐

實但既據抱經設誓已屬回心效順卽應向其確切根究伊里斯滿底遣遞馬匹求賞差使經長齡等給以回諭並賞給銀牌綬段等物令其幫拏張格爾伊果能擒逆自應照格封賞惟該夷類多疑詐均未指有確向亦難據以爲憑朕意夷眾固屬狡誦或長齡等已知張逆所在因卡外道路紛歧且係外夷地方竟爾束手無策恐未能卽時擒獲致罹重咎故爲此尙無下落之說若果如此則居心更不可問試思興師動眾若不速得首逆作何了局長齡等將何顏對朕耶前奏馳催霍罕將該逆妻子縛獻曾否得有該處回信是何情形著迅速據實奏聞所奏見商令武隆阿挑派滿漢官兵四千二百名馳赴圖舒克塔什卡外暫行駐紮該參贊若遵照前旨早由烏什草地前進豈但張逆可就擒獲亦必早膺懋賞又何必如此周章也長齡見派官兵在各要隘安營聯絡聲勢

一面飛諭汰劣克等部落自應如此辦理務須得有該逆確實下落設法擒拏期於必獲此時四城全復張逆苟延殘喘不值久駐重兵致糜糧餉著該將軍等通盤籌畫出卡兵應需若干留防兵應需若干其餘兵丁先撤若干一面具奏一面迅速辦理○戊戌以湖南衡山縣糧價漸昂命平糶倉穀○調張志緒爲山西布政使以林則徐爲江甯布政使方載豫爲陝西按察使前在甘肅按察使○是月緩徵直隸開州等十州縣逋賦

閏五月乙巳朔諭軍機大臣等長齡等克復喀什噶爾已經二月朕無時不懸盼擒獲逆首捷音今既拏獲奸細巴依莫特等接出逆匪潛通信字究訊張逆見在木吉地方潛匿該將軍等派令安福等四人帶兵二千餘名出卡掩捕惟恐兵力尙單應再於楊芳齊慎二人內添派一人其周志林所帶官兵五百名前往接應必

須聲勢聯絡期於前敵有濟楊芳見駐和闐按捕零匪如能迅速
調令出卡最妥或一時不能調集烏什草路距喀什噶爾較近卽
令齊慎前往會同安福等妥速辦理伊薩克拏獲形迹可疑之布
魯特巴依莫特等四名究出張格爾遁匿蹤迹甚爲可嘉伊薩克
著加恩先賞給白玉翎管一箇白玉搬指一箇大荷包一對小荷
包四箇以示獎勵總兵余步雲追捕和闐逸賊玉努斯副將胡超
追捕喀什噶爾逸賊左霍爾悉就捕誅所辦甚好余步雲著加恩
賞給提督銜胡超著加恩以總兵卽行升用所有連次打仗受傷
陣亡官兵著查明咨部照例分別卹賞此時四城已經克復從逆
零匪按捕殆盡逆酋窮蹙逃竄指日就擒未便仍留全師久駐荒
徼虛糜軍餉喀什噶爾見有該將軍參贊等在彼駐紮葉爾羌辦
事大臣著派達凌阿前往署理巴哈布著署理幫辦大臣英吉沙

爾領隊大臣著派蘇清阿前往署理和闐領隊大臣著派成玉前往署理史善載暫令幫辦該三城止宜酌留官兵鎮撫無須多兵駐守著該將軍等悉心籌畫或將省分較遠之四川省原調續調官兵酌撤數千名及東三省官兵三千名內酌撥二千名派令帶兵大員先行統帶各回原營其餘官兵應先撤若干酌留若干該將軍相度情形一面妥辦一面奏聞不必俟奉到諭旨再令起行其善後事宜亦應熟商妥籌豫爲辦理見准該將軍等所奏飭令恒敬速赴喀什噶爾幫同辦理一切方載豫昨已有旨補授陝西臬司並令卽赴新任無庸再令幫辦又據奏伊犁民遣一千五百名除各處民人暨已赦遣犯照凱撤征兵資送回籍外未赦遣犯九百三十九名悉予免罪釋回尙無不可惟請將無家可歸者分撥口內各營入伍斷不可行該將軍等應卽傳旨免罪釋回資送

該原籍一面行知各督撫妥爲安插可也○免回疆被賊滋擾之
八城新舊額賦○丙午諭軍機大臣等昨因四城戡定惟逆首張
格爾窮蹙逃竄卽須派兵追捕亦未便仍留全師久駐將善後事
宜及時妥辦朕思楊遇春出關日久陝甘總督事務緊要凱撤官
兵亦不可無統兵大員彈壓所有應撤官兵卽著楊遇春分起督
押啓行俟進關後先行陛見再回陝甘總督之任楊芳著補放參
贊大臣該提督素嫻軍旅見旣授爲參贊大臣凡一切設謀用閒
及調度追勦各機宜必須盡心竭力與長齡武隆阿知無不言言
無不盡總期將張逆設法擒拏務在必獲不可因有將軍在前意
存遷就觀望方爲不負委任史善載無庸留駐和闐著卽回阿克
蘇等候凱撤官兵到彼酌分一起管帶進關卽回本任昨據長齡
等奏令恒敬方載豫赴喀什噶爾幫辦善後事宜因方載豫已放

陝西臬司止派令恒敬前往著再調派誠端前赴該處與恒敬幫同該將軍等妥爲經理容安見已有旨補授阿克蘇幫辦大臣其所解逆裔阿里雅罕已諭令嵩惠迅速迎赴前途小心押解來京矣○戊申諭軍機大臣等據張井等奏淮水節經報長見在高堰誌椿存水一丈六尺四寸亟須減洩已先將揚糧廳境下游橋壩於四月十六七等日啓放使運河之水分注歸江騰空高寶一帶湖面俾得容納洪湖分減之水旋於五月初一十四等日將山盱之禮字河仁字河先後開放過水其餘各河壩俟察看水勢相機酌開等語前據奏近日清高於黃禦壩並未堵閉是清水業已暢出又經該河督將禮字等河先行啓放湖水仍未見消誌椿存水較上年尤爲旺盛轉瞬大汛經臨仍須堵閉禦壩而湖水亦必接續增長堰工倍形喫重自不得不豫籌宣洩之計惟下游各州縣

民田廬舍上年因啓放昭關等壩業已全被淹浸蕩析離居本年
籌辦宣洩事宜雖據稱見在嚴守車邏等壩不至淹及民田而此
後湖水日見增高必須思患豫防俾堰工可保無虞而下游亦不
至被患方可稍贖前愆若使災黎年年被淹該河督等自問當得
何咎耶至堰肝土石各工務須及早督催工歸鞏固其南北兩岸
臨黃工程亦應迅速勘辦以資保衛毋得稍有疏虞○辛亥諭戶
部奏州縣虧缺錢糧限滿無完請覈實酌賠一摺直省各州縣經
管倉庫責成該管上司層層稽覈詎容稍有侵那如果實心查察
遇案卽參屬員各知畏懼何至任意虧空動輒盈千累萬乃平日
因循瞻顧冀其自行彌補及至萬難掩飾始以一參塞責參革後
審訊虧空之由往往以因公那移爲詞避重就輕開脫遷就以致
帑項多歸無著積弊已極止因向例州縣虧空限滿無完僅令該

管知府直隸州知州分賠一半而道員藩司督撫例內並無著賠專條均得置身事外不足以示懲儆據戶部奏請援照江南安徽辦過成案實令該管上司一律攤賠著通諭各直省嗣後各州縣虧空銀米被參後先在本犯及家屬名下照例按限催追如限滿完不足數查明家產盡絕實在不能追交者即將未完數目作爲十成無論原案是侵是那俱著不行揭報之知府直隸州知州分賠五成勒限追繳其餘五成著失察之道員分賠二成藩司分賠二成巡撫分賠一成均照代賠例限按銀數多寡分年完繳儘有兩案准將前案銀兩依限清完後再行接續追繳至從前已參未結各案亦照此分別覈賠並著各督撫嚴飭藩司道府凡州縣交代徵收存庫錢糧悉令遵照戶部前奏限兩箇月埽數提解司庫仍於年終開單具奏俾帑項不至虛懸追賠俱歸有著以昭覈實

○辛酉徐承恩以病免以吳光悅爲湖北布政使龔鯤爲湖南按察使

山西左

○甲子諭軍機大臣等本日據長齡等由六百里

加緊奏報朕意必是擒逆捷音或得其逆屬乃覽奏止係跟捕張逆並殲勦和闐逸匪情形又成虛盼張逆前在木吉藏匿又竄到拉克沙地方距喀拉提錦布魯特愛曼較近經長齡等檄令該部落幫同官兵設法圍拏副將郭繼昌等卽在倭里塔克暫紮俟拜哈第等確探的信馳往密捕因獸猶闕總須加意隄防乘機掩取勿任再竄至霍罕不肯借兵助逆並有要拏該逆獻功之說其言似屬恭順但長齡等兩次差派回子前往諭擒張逆並令將該逆妻子同巴布頂之子先行送出何以至今未行回報其言恐不足憑信惟旣稱擒逆自效亦可乘機導諭催令縛送及獻出逆屬以膺封賞至提督達凌阿送到自卡外投出陝西民人白鳳儀等稱

係什克南伯克庫布特差來報信經長齡等飭該民人白鳳儀同葉爾羌伯克回子前赴什克南給諭獎勵令其設法擒獻照格封賞毋洩風聲所辦尙屬妥協朕心懸萬里亟望捷音之至總以必獲張逆爲要計此時克復四城已及數月一切應行查辦之事甚多何以未據該將軍次第具奏長齡惟當一面督飭將弁設法擒拏首逆一面將善後事宜悉心覈酌趕緊妥辦毋再以空言塞責至楊遇春已有旨令其來京陛見今奏楊遇春於本月十八日帶領馬步官兵三千餘名出卡接應自係尙未接奉前旨此時該署督曾否折回著長齡體察情形如必須楊遇春出卡卽著仍留該處暫緩來京如楊芳可以接辦仍遵前旨令楊遇春來京陛見回署陝甘總督本任嗣後拏獲張逆馳報紅旗用八百里具奏或探得張逆確信卽日可以成擒用六百里加緊至辦理善後事宜及

一切覆奏止准用五百里馳報不准棄用六百里加緊漫無區別致勞驛站所奏赫子爾拉克地方有馬步賊匪數百人經郭繼昌等帶兵追剿殲斃賊匪二百數十人捉獲活賊十四名及在和勒木地方拏獲在逃賊目伊滿等八名俱係張逆信用頭目訊明正法辦理俱好其烏什黑帽回子糾眾被戕及曉諭布嚕特回報獻馬各情所奏均悉至穆圖巴拉父子敘順被害情殊可憫著長齡等確查該阿渾有無子嗣奏請恩卹其伊斯瑪依爾既據伊兄玉素普稟稱該回子曾經從逆其在臺迎候並非出自誠心著無庸議卹以示區別玉素普竟能大義滅親可嘉之至其僞阿奇木伯克阿布拉攻陷和闐甘受僞職前經降旨革去頂帶留營效力該伯克並未出力及暫留待質安集延頭目推立汗狼子野心經長齡等將該二犯凌遲處死亦足伸國法而快人心又據奏巴哈布

甚爲出力前已有旨令其署理葉爾羌幫辦大臣無庸飭回本任至呂天俸病未復元漢中地方緊要著卽令其回任所帶漢南官兵卽派參將唐倬妥爲管帶俟事竣再行撤回至凱撤官兵前經長齡等奏撤二千四百餘名茲又據奏凱撤三千六百名俱著照所奏辦理見在軍務大局已定無庸多留兵力凱撤爲第一要務著長齡酌量情形四城應行留防若干阿克蘇烏什二城應否酌留若干剿捕張逆需用若干此外多餘官兵卽令全撤次第起行以節勞費葉爾羌大臣印信著交禮部補鑄頒發○癸酉諭前據程含章列款密參署浙江巡撫劉彬士不能清白乃心聲名甚屬平常自言窮翰林出身住京廿餘年負欠不少今番須要還債人咸謂餓虎出林浙江鹽務經帥承瀛辦有起色止須率由舊章乃劉彬士諸多挑駁商人心滋不服仁和縣鬧漕一案劉彬士卽揚

言不宜動兵其識見偏謬品節不端已可槩見等語時孫爾準陞見出都當卽密諭該督據實查奏茲據奏稱劉彬士揚言不宜動兵一節於入都路過杭州時見劉彬士據稱初聞程含章勒兵圍拏頗疑辦理過當及提犯審訊其聚眾毀廠細毆書役拒傷官兵均屬實情則用兵圍拏勢亦不得不然嗣於回抵杭州時知此案業經審結其挑駁商人一節見在細察商情頗欠踴躍緣上年奉旨籌加鹽價各商聞知爭先完課劉彬士到任查知奏明勒令各商將餘價照引追繳商人趕完課引之時多有重利借債圖賺餘價之利者今按引追補無利可圖諸甲商隨以另款商捐剝費雜費二項銀兩每年用有贏餘呈請以公辦公撥補餘價求免另追經劉彬士批駁不准又前任巡撫帥承瀛於商網一款頗有贏餘留存運庫嗣後各任巡撫俱盡數提爲公用劉彬士查悉情形曾

向人言將來商網用費不敷何能賠墊甲商稟請運司欲以程含章札提置買義地善舉銀兩先在雜費項下暫動將銀撥歸商網備用又經劉彬士批斥不准浙鹽甫有起色須於認真之中寓休養體恤之意業經面爲規勸其負欠還債一節細加查訪並無在浙索債之人劉彬士莅任數月辦理庶務頗爲盡心操守亦屬謹飭輿論僉同等語朕行政用人一秉大公至正督撫大吏中如果實有簠簋不飭聲名狼藉者大小臣工原許風聞入奏朕從不肯顛預了事必將貪黷之員立即斥革治罪然必須劣蹟昭著確有憑據豈容以捕風捉影之詞妄行參揭程含章率聽不根之言無端入告伊視朕爲何如主輒敢以此等伎倆巧爲嘗試耶程含章陳奏不實之咎實無可辭著交部嚴加議處卽來京聽候部議山東巡撫著賀長齡暫行署理山東布政使著鍾祥署理其山東按

察使著賀長齡委員暫署○諭軍機大臣等長齡等奏探明張逆藏匿地方分路往捕並卡外回夷來營納款一摺張逆見竄至拉克沙距喀拉提錦較近並與達爾瓦斯琿都斯及布噶爾拔達克山等處相通楊遇春帶領馬步官兵三千餘名出卡所過布噶特愛曼隨處撫諭甚爲恭順並據副將郭繼昌等探明拉克沙山內有賊黨數百人其山後深河一道上繫鐵索浮橋見飭該副將等選派官兵回子帶同愛曼布噶特比愛散繞山潛往拆毀浮橋見又派楊芳帶領馬步兵一千一百餘名星夜馳往相機督辦並據各部落伯克差人來營納款投誠又據幹竺特星進帕爾西字表文金兩並遞將軍等物件幹罕伯克遞將軍腰刀等件經長齡等諭令趕緊前往設法擒逆可膺莫大封賞該回夷等均稱已派人於各境要路堵截必定生擒送營該將軍照例筵宴優加獎賞並

回賞各伯克元寶綬段茶葉布匹等物令其攜回愛曼並派官兵護送出境所辦甚是此時外夷各部落及阿坦台汰劣克等各布魯特均已差人堵截各要隘布置尙屬周密朕日夜佇望馳奏紅旗○是月貸湖北黃州協道士汛營兵丁穀石緩徵山東濟甯魚臺二州縣雹災新舊額賦

六月丙子諭軍機大臣等張井等奏查驗黃河上下各工及水勢消長情形摺內據稱本年春閒啓放新河之初惟附近關孟灘一帶頗形淤墊皆係浮沙嗣後經拉浚日久兼以此次汛漲水力猛勁刷出河泓大溜奔湍直瀉不但與張井前次往看情形不同卽比四月杪蔣攸銛穆彰阿所見情形亦大相懸殊全河溜勢頗爲迅駛長水尙能容納等語本年黃河自五月二十後屢次斗長甫屆伏汛卽已水勢浩瀚必須去路暢順河身方資容納據奏前此

淤墊處所皆係浮沙尙易刷動見在大溜奔湍自係仍由舊河東注此後汎漲方長但能如所奏日漸刷深不至壅滯爲患豈不甚善該督等卽當督飭道將廳營加意防範務保安瀾是爲至要另片奏淮源疊次報長自應豫籌宣洩見已啓放仁禮義三河及智壩暢洩湖漲如不見消再啓信壩其車邏南關中新各壩總不可輕議啓放本年遇閏節候較早農田收穫不至過遲該督等務當體察水勢情形權衡利害輕重相機辦理勿令民田復被淹浸方爲妥善其揚河等廳應修掣卸工段尤當嚴飭承修之員照估認真修築毋得仍前草率以資捍衛○壬午 上詣 黑龍潭祈雨○丙戌雨○己丑源溥卒以薩迎阿爲甘肅按察使由蘭州道遷○丙申諭軍機大臣等蔣攸銛等奏來年新漕請仍行海運盤壩一摺近年河底逐漸淤高清水不能暢出以致漕運阻滯琦善等請開

王營減壩辦理不善仍未能如法通漕本年倒塘灌運未可常恃
來年重運亟應豫爲籌計該督等請仍行海運所奏乃有備無患
之意所有江蘇省來年新漕除江甯揚州淮安徐州通海等四府
二州照舊各歸本幫兌收轉運外其蘇州松江常州鎮江太倉等
四府一州仍雇用海船運赴天津一切海運事宜除成案可循外
此內如須量爲變通著漕運總督直隸總督山東巡撫江蘇巡撫
通盤籌畫定議俟奏到時再降諭旨海運本非良策朕所以勉從
所請者原以河漕不能兼辦騰出河身俾去其受病之源用復以
清刷黃之舊仍責成張井潘錫恩各發天良實力講求疏淤導滯
務令黃水落低清水暢出以期漸復舊規本年江南首二進回空
軍船著准其截留河北其蘇松常鎮太等處漕米旣改由海運此
項船隻原可空出姑令暫留以備萬有一然之需朕意來年河漕

暢順原可無庸盤壩自當即用原船北渡非但軍船暢行卽商賈各船亦得源源北上俾商販流通不虞短絀彼時卽可將截留河北空船飭令南下歸次若恃有盤壩章程卽不加意修防一籌莫展於全河毫無裨益試問該河督等能當此重咎否朕言出法隨決不寬貸毋謂教之不豫也○丁酉諭從前乾隆年間逆回布拉呢敦霍集占以叛伏誅布拉呢敦之子阿布都哈里本係應行緣坐之犯 皇祖高宗純皇帝憐其年幼無知貸其一死賞給功臣家爲奴道光三年朕因其爲奴已久尙屬安靜加恩照當差回子之例將伊一家入於正白旗蒙古賞給差使今張格爾膽敢入卡肆逆跳梁不靖實爲元惡大憝張格爾係薩木薩克之子布拉呢敦之孫阿布都哈里係其胞叔法當緣坐朕仰體上天好生之德不忍予以駢誅然究不便仍令在京居住阿布都哈里並其長子

伯巴克次子阿布都色莫特其孫阿什木及眷屬俱著拏交刑部
定地發遣並著理藩院內務府通行曉諭在京當差居住各回子
以此次將阿布都哈里及其子孫發遣因其本係逆裔又係張格
爾親屬應行緣坐不忍誅戮僅予發配卽係寬大之恩與另族回
子全無干涉此外毫不株連爾等俱宜各安生業照舊當差不必
妄生疑畏○戊戌諭阿布都哈里及其長子伯巴克次子阿布都
色莫特伯巴克之子阿什木著刑部分撥雲南廣東廣西福建四
省定地發配各在該省按察司監內永遠嚴密監禁毋許與外人
交接及傳遞信息等事每屆年終各該省臬司將該犯等在監是
否安靜稟詳巡撫具奏一次阿布都哈里之妻馮氏女怕特買伯
巴克之妻楊氏女大妞著刑部定地發江甯京口杭州乍浦等處
駐防爲奴其女如年未及歲俱准其母隨帶到配後該將軍副都

統等卽咨報軍機處每屆年終著將該犯婦等是否安靜咨報軍機處一次阿布都哈里等分起發配著沿途各督撫派委委員小心押解所有該犯等在京貲產俱著准其帶往其僕婦馬氏石氏及伊家人馬老卽儒孜尅馬三卽玉笋楊大卽阿克底李大卽木勒滿等俱屬無干著刑部釋放並著將該犯等配所及分起押解日期具奏

東華續錄

道光十六

臣王先謙敬編

臣周瀚蕃恭校

秋七月丙午諭前據劉彬士奏程含章提用商綱銀六萬三千兩係屬額外溢支並不追溢完餘價程含章回奏彼此各執一詞當降旨交琦善前往浙江會同朱士彥秉公確查茲據奏稱每年所收商綱多則三萬八千餘兩少則二萬一千餘兩銷引有衰旺故輸款有多寡此項商綱及備公二款歷任巡撫均係各歸各任扣算提支若照每綱引額科算按年提銀二萬餘兩則遇僅收二萬餘兩之年又將如何找補此項贏餘銀兩從不列款報銷卽屬程含章應提之款並非贓私可比上年所完正餘引一百三十餘萬道係自嘉慶二十二年戊寅綱起至道光六年丙戌綱止所完多

係舊引豈得謂之溢完該商等雖完課在先查明鹽未銷出仍應著追餘價部議甚明劉彬士將上年九月奉旨加價日起至十二月初六接准部文之日止所完引課比較道光五年計多完四十餘萬引一律作爲溢完奏准餘價於鹽斛已未售賣轉未確查與成案及部文俱不相符自應照原奉部文查明已未銷售嚴辦等語程含章查無額外溢支及漏追餘價情節其回奏存留商綱一千餘兩聲敘舛錯且出貲捐辦各項於商綱寬裕時照數提還實屬見小至甄別副將鄧宏參將吳賜二員及委令副將徐慶超遊擊李鶴松等遞相接署俱於具奏後始行知照提督亦與體制未協均應交部議處惟伊從前列款參奏劉彬士率聽不根之言妄行入告爲先發制人之舉其咎尤重業經吏部議以革職本應照議罷斥姑念其平日居官尙好程含章著加恩以員外郎用以觀

後欽劉彬士因恐本年滯銷商綱不敷支用何難設法疏銷俾臻
充裕乃奏請追補餘價既未查照部文又於商綱一款不查明原
委率行項肩入奏亦屬不合劉彬士著交部議處○諭軍機大臣
等御史吳敬恒奏衍聖公官屬濫給劄付請嚴示限制一摺據稱
近年坊刻摺紳內載衍聖公官屬自林廟守衛司百戶管勾司樂
以至各屯官等職或每年更換或數月更換雖給劄付咨查原籍
並非該員自充實皆託人頂替其僅執劄付未刊入摺紳者又不
知凡幾並聞該處有包攬之徒攜帶劄付自赴各省私行濫給詎
騙招搖其弊百出且司樂一官秩止七品卽挂朝珠黃緣咨送賄
賂公行再衍聖公官屬一接劄付無論父母存歿捏告終養所遺
之缺卽另補他員展轉遞讓俱爲將來覃恩地步難保無身家不
清等語國家尊崇至聖先師至優極渥惟四氏學教授學錄例由

衍聖公咨送吏部具題如該御史所奏該員竟有託人頂替及包攬之徒攜帶割付私行濫給並捏告終養展轉遞讓等情或卽係不肖屬官之所爲該御史既有此奏著賀長齡秉公確查具奏毋任有頂替滋弊並濫給混咨情事其將來呈請封典亦著衍聖公詳悉查明不得以身家不清之人濫竊恩綸以昭覈實○前任工部尙書陸以莊卒○戊申參贊大臣楊芳謝恩得旨汝之忠勇朕早知之一力擒拏逆首立功身膺懋賞勉之又勉○己酉頒御製四體字憫忠詩勒石喀什噶爾昭忠祠○辛亥諭總管內務府大臣等前於道光四年經內務府具奏將宮內各處原設器械火藥等項全行交出更換木棍其圓明園內除技勇學所留長槍腰刀等項軍器並綺春園存留巡更烏槍撤袋均經交出更換木棍是宮內圓明園卽不應另有收存軍器備有私行藏匿卽屬大干

例禁況太監等供奉內廷尤宜安分守法敬謹當差豈得以違禁器械任意攜入宮禁總由該總管太監等平日漫不經心應查不查遂至視爲故常致有自鳴鐘太監劉得英吳喜在園內私放鳥槍之事除此案交內務府嚴審定擬外各處太監或不免有私藏軍器之處自應嚴加整飭以肅宮禁惟令立時槩行交出轉恐該太監等心存畏懼仍復隱匿不能覈實著予限十日令各該處首領太監等出具並無私匿器械甘結報明本管總管太監由總管太監於本管處所復行逐細嚴查覈實具奏仍加結交敬事房並總管內務府衙門存案經此次查辦後除技勇學太監仍照前定章程准其學習技藝外如有瞽不畏法膽敢仍蹈前轍私藏軍器之人查係弓箭弩彈等物卽照例治罪儻竟敢將鳥槍火藥金刀器械仍前收藏一經發覺必將其人照違旨例加等問擬卽行正

法該管首領太監匿不隨時報出卽照爲從例治罪本處同伴太監耳目切近尤易知覺果能立即告知該首領不難隨時敗露如經告知首領首領尙爲隱匿則專治首領之罪首報太監卽應免究若太監等心存瞻顧不行舉發事犯時本處太監無論知情不知情一槩照爲從例治罪其各門首領太監於各處太監出入私行攜帶時未能查出一併從嚴究治該總管太監等此時不行詳查將來別經發覺一併嚴懲不貸著通行曉諭宮內圓明園等處將此旨恭錄懸挂俾各懷遵著爲令○王子諭協辦大學士禮部尙書汪廷珍人品端正學問淵博嘉慶十七年蒙 皇考仁宗睿皇帝簡用上書房師傅與朕朝夕講論非法不道迨二十三年受任總師傅倍加勤慎攷古證今深資啓沃朕親政後畀以左都御史禮部尙書擢襄綸閣晉錫宮銜凡所陳奏均得大體本年閏五

月閒遘疾輿經賞假調理遣醫診治並賞給人蔭派員署理部務
猶冀剋期就愈倚任方長遽聞流逝實深悼惜著加恩晉贈太子
太師入祀賢良祠賞給陀羅經被派奉宸苑卿奕紀卽日齋往大
阿哥於初十日帶領侍衛十員前往賜奠由廣儲司賞給銀一千
兩經理喪事其任內一切處分悉予開復所有應得卹典該部察
例具奏伊次子候選主事汪報原俟服闋後遇缺卽補以示朕篤
念耆臣至意尋予祭葬諡文端○張志緒休致以葉紹木爲山西
布政使何煊爲廣西按察使由福建鹽道遷○乙卯以鍾昌爲盛京禮部
侍郎福勒洪阿署兵部右侍郎由內閣學士署○丙辰以姚文田爲禮部
尙書湯金釗爲左都御史轉顧皋爲戶部左侍郎調李宗昉爲戶
部右侍郎以白鎔爲工部右侍郎由內閣學士遷○丁巳以吏部尙書盧
蔭溥協辦大學士○己未諭通州民人王文弼等呈遞封章控告

英和家人張天成增租擾累一案見經托津等訊明擬結英和當時置買此地並不問明原租致張天成私加租息且徐永祥以在官人役司其家事輒聽張天成商令捏情控告漫無覺察迨該佃戶等連次將被控情由呈訴懇求減租亦難諉爲不知乃任聽張天成等捏詞搪塞不加深究及降旨令其明白回奏又不據實陳明意存隱飾本應照托津等所議革職治罪姑從未減著革去紫韁卽開協辦大學士之缺仍交部嚴加議處○以富俊爲理藩院尙書協辦大學士由吉林將軍遷○庚申諭國家簡用大臣匡襄治理必須謹慎持躬公忠任事方爲無忝厥職永受國恩昨英和於伊家人張天成私加租息被控一案其失於覺察尙係過之小者惟徐永祥以在官人役輒與伊家人交好已屬漫無約束甚至司其家事商同捏情控追租息苦累閭閻若非英和平時信任驅使何至

狐假虎威肆無忌憚英和受三朝厚恩應如何戒滿持盈益加
傲懼乃不自檢束聲勢赫耀竟致非其所屬之州縣亦有仰希風
指意存見好之事此在明季宦族專權縱恣招搖生事或不免倚
勢欺陵我朝綱紀肅清官方砥礪豈容恃勢妄爲至此從前和珅
專擅其始不過一二無識之徒趨承依附漸至自作威福中外側
目莫敢上聞所謂涓涓不塞遂成江河者不至於潰敗決裂不止
若使大員稍有憑藉卽可妄行則位冠列卿職居津要者將復無
所底止朝廷豈尙有法紀乎凡爲大臣者承恩愈厚尤當受寵若
驚夙夜靖共常存敬畏何至啓人迎合自蹈愆尤爲此特降諭旨
剴切申誡嗣後在廷滿漢大臣務益矢公忠倍加恪慎庶幾克承
恩眷永保令名以副朕教誨成全之至意○辛酉以那清安爲熱
河都統松筠署左都御史

和請照違制私罪革職英和在官人役徐永祥司其家事與家人張天成商同捏情控告迨佃戶等連次呈訴復任聽捏詞搪塞不加深究又不據實陳明本應照部議革職姑念其平日辦事尙屬認真亦曾出力英和革去理藩院尙書鑲黃旗滿洲都統並太子太保銜拔去花翎加恩賞給二品頂帶補授熱河都統以觀後效○除江蘇長洲吳縣義冢地賦○以那清安母老命仍爲左都御史○甲子諭軍機大臣等長齡等奏喀拉提錦布魯特比效順並卡倫外近日籌捕情形及保奏各城參贊大臣各摺朕閱該將軍等所奏喀拉提錦布魯特比薩底克既願出力報效親見張格爾帶數十人窮蹙逃往達爾瓦斯何難在彼設法擒獻乃復遠來卡內送信始同該部落與沙伊布拉克伊木商同擒拏是其狡詐情狀已屬顯然即前此各處偵探逆裔潛匿地方迄無定所是否該

逆虜迹無常抑係該夷等虛詞搪塞爲嘗試官兵之計該將軍等不加深究輒以入告試問該逆果有確蹤各部落同心效順何至四五月之久竟同海捕計自克復四城後虛糜帑項不可勝數長齡等不自知籌辦之失宜仍欲留兵荒徼俟剿捕得手再行陸續撤回豈不思官兵出卡旣不能深入窮追轉令外夷窺我虛實啓其輕視之心所關甚鉅而轉餉之難尙屬其次長齡等接奉此旨著卽將出卡之將領官兵全行撤回仍檄諭外夷各部落以張格爾入卡肆逆荼害生靈實爲元惡大憝罪不容誅見在各部落旣多輸誠效順情願截拏諒該逆飄泊遊魂不難擒縛來獻以邀封賞大皇帝因官兵出卡駐紮恐爾恭順各部落不無驚懼並恐官兵不無滋擾特降恩旨曲加體恤卽將大兵全行撤回卡內爾等部落益當勉竭誠悃商同設法將逆酋張格爾迅速擒拏或獻誠

軍門必當奏明大皇帝照前懸賞格懋加封賞該將軍等一面繕發檄諭一面卽將大兵暫留八千名其餘均卽分起凱撤自楊遇春楊芳齊慎以下將領及御前乾清門侍衛巴圖魯侍衛等悉令進關楊遇春仍遵前旨督押官兵進關後來京陛見再回總督之任楊芳等各回原任前經降旨將東三省官兵先撤二千茲亦著全行撤回歸伍長齡著暫留喀什噶爾督同各城參贊辦事大臣等辦理善後事宜及設法擒拏張格爾務獲俟一切軍務完竣再行奏明候旨所留官兵八千名應如何酌量分布各城卽著體察情形辦理所奏蘇倫保骨殖卽著色普清額攜回歸葬並飭沿途地方官妥爲照料以慰忠魂前據鄂山奏善後事宜一摺著鈔寄長齡等閱看是否可行一併妥議具奏並發去新鑄葉爾羌大臣大臣印信一顆交長齡等祇領頒給可也○乙丑以盧坤爲山東

巡撫前任

○戊辰免兵差過境兼辦糧運之伊犁各城甘肅各

州縣額賦協濟軍需之甘肅陝西各州縣十分之六兵行過境之

盛京吉林黑龍江順天直隸河南四川各州縣額賦十分之四○

己巳諭上年逆裔張格爾入卡滋事攻陷城池戕害官弁葉爾羌

接壤阿克蘇之伊犁都軍臺官兵被賊傷害迫額爾古倫打退賊

眾復敢糾約回匪五六千人在距城八十里之渾巴什河南岸屯

聚向西北行走逼近烏什邊界烏什存城官兵不滿三百時揚威

將軍長齡由伊犁取道那拉特卡倫距大營尙遠賊氛甚熾勢若

燎原儻守禦無方致有失事則東四城俱危如朝露尙復成何事

體長清甫經到任卽能激勵回兵查拏奸細嬰城固守調度得宜

並以烏什輔車相依分兵防堵鉦鼓相聞聲勢聯絡巴哈布接據

蘇倫保求援之信卽調土爾扈特和碩特蒙古兵帶其子札爾漢

迅速前往奮不顧身達凌阿一聞徵調卽帶勁兵往援與長清盡力防禦渾巴什河南岸及烏什察哈拉克臺之戰達凌阿巴哈布督兵迎勦殺賊無算並將賊首庫爾板素皮等殲斃已爲殄賊之先聲是長齡等未到大營之先非長清不能力扞孤城非達凌阿巴哈布不能痛殲賊魄保障東四城俾大兵進取有資厥功甚偉見當大功告竣允宜特沛殊恩用酬懋績長清達凌阿巴哈布俱著賞給雲騎尉世職長清之子翰林院筆帖式富春著加恩以六部主事卽補巴哈布之子札爾漢前已降旨賞給筆帖式著加恩以六部筆帖式卽補達凌阿之子慶安年甫十四著俟及歲時加恩以六部筆帖式卽補以示朕論功行賞之至意○庚午諭上年逆裔張格爾入卡滋事朕命將出師聲罪致討天戈所指四城立克若能卽日擒渠膚功全歲則揚威將軍長齡等宜如何論功行

賞殊勳偉績自不待言矣乃張逆先期遁去至今迄未就獲實由長齡等辦理不善所致今當凱撤竣功在事出力人員均應敘績加恩其中亦不能不略示區別長齡前因三戰皆捷已賞加太子太保銜此時無可施恩俟拏獲首逆再降恩旨參贊大臣楊遇春於克復喀什噶爾後親自帶兵收復英吉沙爾葉爾羌二城並派楊芳等攻取和闐調度得宜楊遇春著賞還太子太保銜仍交部從優議敘其子都司楊國佐著賞加遊擊參贊大臣武隆阿前因患病回喀什噶爾後甫出圖舒克塔什卡倫又復因病折回並無出力之處無可施恩今已授喀什噶爾參贊大臣著隨同長齡辦理善後事宜並嚴緝張格爾務獲以觀後效參贊大臣楊芳上年在柯爾坪前敵著有勞績本年收復和闐一切布置俱合機宜並生擒賊目噶爾勒伊本兼雲騎尉世職著加爲騎都尉並挑乾清

門行走仍交部從優議敘新授都統哈琅阿副都統阿勒罕保卓爾琿保倭楞泰吉勒通阿德海新授烏什辦事大臣多貴新授英吉沙爾領隊大臣那桑阿新授喀什噶爾幫辦大臣蘇清阿新授葉爾羌幫辦大臣扎克桑阿俱著交部從優議敘內閣學士容照桂輪副都統新授阿克蘇幫辦大臣容安伊犁領隊大臣恩緒俱著交部議敘新授察哈爾都統安福著賞戴花翎伊犁領隊大臣祥雲保碩隆武上年帶領伊犁官兵行走遲緩本應革職治罪因查由冰嶺難行責令圖功自贖該二員功過僅足相抵無庸給予議敘甘肅提督齊慎陝西漢中鎮總兵呂天俸四川重慶鎮總兵余步雲山東登州鎮總兵成玉甘肅永昌協副將胡超莊浪協副將李士林安西協副將郭繼昌金塔協副將張國相雲南曲尋協副將周志林俱著交部從優議敘其辦理糧臺及轉運各員經理

妥協尙無貽誤俱著交部議敘署陝甘總督陝西巡撫鄂山總理
軍需事務繁劇著加太子太保銜並賞戴花翎新授山東巡撫盧
坤著加太子少保銜烏魯木齊都統英惠著賞戴花翎新授喀什
噶爾幫辦大臣副都御史誠端著賞給二品頂帶英惠鄂山盧坤
誠端仍俱著交部從優議敘新授葉爾羌辦事大臣副都統恒敬
庫車辦事大臣頭等侍衛那彥寶新授和闐領隊大臣頭等侍衛
果良額新加副都統銜授庫爾喀喇烏蘇領隊大臣常格俱著交
部從優議敘吐魯番領隊大臣副都統銜賡音泰前因陳奏不實
拔去花翎部議降調已加恩改爲革職留任無庸給與議敘土爾
扈特貝子巴勒丹喇什和碩特頭等合吉烏爾圖那遜前因帶兵
出力已加恩挑乾清門行走仍俱著交理藩院從優議敘土爾扈
特管旗章京隴吉特甲喇章京額爾德尼等俱著交理藩院議敘

其跟隨巴哈布打仗之蒙古阿勒巴圖一千名再著賞銀一千兩
此次議敘各員均著照軍功例議給用示朕振旅策勳有功必錄
之至意○壬申以書諭勤勞晉曹振鏞太子太師蔣攸銑文孚太
子太保加王鼎玉麟太子少保○癸酉以琦善爲內閣學士兼禮
部侍郎銜○是月給奉天錦州等三府州縣水災旗民口糧緩徵
山西薩拉齊廳屬水災額賦

八月庚辰以阿勒清阿爲廣東布政使桂良爲河南按察使

曲四建

昌道

○壬午諭長齡等奏官兵出卡勦洗逆黨情形前據長齡等

奏稱探知張格爾逃往卡外在達爾瓦斯之藏堪地方藏匿楊遇
春楊芳分帶官兵前往追捕茲據奏於七月初七日在塔里克打
坂相近地方遇見賊匪二千餘人當經副將郭繼昌等督兵迎擊
賊匪上山用槍抗拒協領壽昌等直上攻擊斃賊二三百名該匪

復敢放槍抵敵協領都凌阿委參領郭全首先攻上均中槍陣歿
嗣經官兵擊斃督陣紅衣賊目三人始敗退後面山梁踞紮旋經
楊芳督同領隊安福等分路進攻郭繼昌等由賊後兜擊賊匪腹
背受敵拌死抗拒官兵兩面夾擊斬擒一千五六百名逃走者僅
百餘人侍衛色克精阿委參領巴爾江阿守備蔡汝寅及參領哲
里善均先後被傷陣亡殊爲可惜該將軍等旣深知張逆藏匿地
方派兵出卡追捕自應倍加慎重乃虛延時日糜費兵餉竟令零
星殘匪傷我官兵縱將該逆黨斬獲多名已屬不值長齡等調度
失宜辦理不善咎無可辭長齡楊遇春楊芳武隆阿俱著交部議
處安福首先擊賊致受槍傷著賞給譽勇巴圖魯名號其陣亡之
都凌阿等著交部照例議卹所有傷亡官兵著該將軍等查明咨
部照例賜卹○諭軍機大臣等據長齡等奏官兵在卡外勦洗逆

黨兵將聞有傷亡霍罕回稟殊不足信並籌議善後請以逆裔管理西四城各一摺大兵克復四城已經數月迄未得逆酋張格爾實在蹤迹虛延時日糜費兵餉止遇逃竄卡外零星殘匪竟敢損我官兵雖據奏斬擒逆匪千餘名逃脫者不過百餘名而我帶兵將弁及兵丁等已傷亡數十人之多殊爲可惜不值之至外夷各部落內聲言效順者既知其爲緩師圖賞之計乃猶稱布魯特咸覩兵威或將該逆拏獻豈非仍在夢中其霍罕伯克之誦詐又何待遣使來營求賞元寶始爲派兵擒渠方知其妄長齡等總不咎前此辦理之失宜迨接奉六月十六日所降諭旨飭將卡外官兵酌撤始爲此奏披覽之下憤懣殊深大兵久駐卡外各布魯特勢不能不自保其疆圉既有逃竄零星回子依附其地亦止可待其來而殲之何得墮其詭計深入其阻况張格爾並不在其中更不

值輕勞兵力致損國威而張賊勢至所奏善後之策竟請以久經
留之逆裔阿布都哈里賞給職銜放歸回部管理西四城回眾
尤爲紕繆之至長齡老諄糊塗一至於此武隆阿隨聲附和俱著
嚴行申飭爲今之計總當遵奉前旨將西四城仍照舊章辦理一
切分兵防守及清查叛產籌備糧餉並種種未盡事宜作速從長
計議務期經久無弊方爲妥善其所奏傳諭霍罕伯克以張格爾
係無足重輕回子該伯克既不肯將其拏獻又不肯將其家屬送
出卽永遠不准入卡貿易一節尙爲得體稍合朕意該將軍等一
面籌撤官兵議及善後一面設法擒拏張逆小心防範各城若再
稍有挫失首逆又不可得試問能當此重罪耶○乙酉調鍾昌爲
刑部右侍郎特登額爲盛京禮部侍郎○巳丑諭長齡等自克復
四城距今已六月之久張逆愈竄愈遠不能立定主見籌辦萬全

轉頓兵荒微虛延時日糜費兵餉致零星殘匪傷及官兵雖據奏
斬擒一千五六百名脫逃僅百餘人究屬長齡等辦理不善咎無
可辭本應照部議革職姑念道路遼遠一時難以更換長齡楊遇
春楊芳武隆阿俱著從寬改爲革職留任以觀後效○壬辰調多
山爲盛京工部侍郎海齡爲盛京刑部侍郎○癸巳諭那彥成奏
裁汰通省挂名吏役覈實查辦完竣所辦認真甚屬可嘉直隸大
小衙門挂名吏役過多包差滋擾苦累閭閻前經該督奏奉諭旨
酌定應留名數造立循環冊簿年終報明該管道府具報總督衙
門查點餘皆革退不准額外增添茲據奏嚴飭各屬將各該衙門
酌留吏役名數分別造冊具結呈送查覈並委道府丞倅分往確
切查點按名寫榜出示懸挂城鄉俾眾知曉見據冊報通省革除
吏役竟有二萬三千九百餘名之多官官相護朋比爲奸尙復成

何政體直隸如此他省諒亦不免著通諭直省各督撫一律飭查
據實裁汰按照那彥成所奏章程辦理備於查辦後地方官復敢
額外私增或棍豪冒充肆擾一經查出即將該地方官嚴參議處
吏役加等治罪此係各該督撫必當認真查辦之事要在行之以
實持之以久毋得視為具文用副朕釐剔弊端至意○以龔守正
為內閣學士兼禮部侍郎銜由詹事選○丙申諭軍機大臣等前據蔣
攸銛等奏來年新漕仍行海運盤壩當經降旨准其海運惟盤壩
一節彼時即不准行其軍船本係空出准其暫留河北以備萬有
一然之需朕思海運原非良策以今年河湖情形而論本可不行
惟該督等既以河漕不能兼辦意在騰出河身復以清刷黃之舊
要知清水既能刷黃焉有不能濟運之理朕因蔣攸銛到任後或
別有所見問抑河湖另有別情是以暫從所請此後並未另有所

奏可見伊等所以復籌海運兼將回空軍船截留河北者意在一行海運清水卽無庸多蓄高堰可保無虞明春清水不能敵黃又恃截留軍船爲盤壩之用總爲自卸干係巧占地步止顧目前於國計並不通盤籌畫試問爲國乎爲身乎受國厚恩任用之人其可不秉天良耶再此項軍船截留河北水手聚集彈壓匪易油艖修理諸多不便伊等恃有此項軍船轉將清水消洩過多明年必不能敵黃濟運成何事體總之清水多蓄固可慮消洩太枯亦是伊等之咎前於張井等秋分河湖平穩摺內批示甚明來歲新漕除蘇松常鎮太倉仍行海運外其餘軍船總期照常北渡卽萬不得已亦止准用本年倒塘灌運之法並著該督等各秉天良體察情形海運如可停止仍由內河行走卽將前議撤銷可也所有本年江南首二進回空軍船俱著全行及早歸次斷不准截留河北

以爲盤壩之用儻明年河道不能通暢貽誤漕運咎有攸歸朕育
出法隨決不寬貸○百春以病解任命福縣以三品頂帶爲倉場
侍郎調盧坤爲山西巡撫以琦善爲山東巡撫由內閣○是月賑
陝西略陽縣湖北江陵監利二縣水災給江淮等處被災帑丁月
糧緩徵長蘆滄州甯河縣及嚴鎮場被水竈課蠲緩江蘇高郵等
四十七州縣衛廳被水新舊額賦

九月丙午諭軍機大臣等蔣攸銛等奏籌備來年接運新漕請先
行借撥銀兩爲盤壩經費一摺本年大汛已過見交霜降水勢有
消無長黃河經汛水刷滌較前暢順洪湖存水一丈五尺餘寸見
將壩河全行堵閉不至宣洩過甚看此情形明年新漕抵壩正可
乘黃水未漲之前照常開壩放船則趲渡一幫卽免一幫之阻滯
儻或江廣重船到時汛水業已長發不能啓壩放行亦可仍用倒

塘灌放之法俾令原船北來省卻無數周折況今春倒塘渡船均已全數抵通有早無遲何不可以倣照辦理而必亟亟議及盤壩雖據奏水勢長落靡常恐致臨時貽誤爲萬不得已之請無非先占卸責地步豈實心爲國之道若沾沾目前並不爲國是經久計止圖自卸干係則兩江重任盡人皆可爲之何必特加簡畀耶該督惟當遵照前旨與訥爾經額等會同妥辦不得再議盤壩所請先於江蘇藩關各庫借撥銀六十萬兩豫備應用之處著不准行

○戊申 上閱健銳營兵○諭軍機大臣等長齡等奏卡外官兵先後撤回楊遇春等帶領酌撤遠省官兵起行並審辦賊目飭拏逆首情形一摺官兵出卡追捕張逆日久未獲早應撤回回營以節無益之費見據什克南將助逆之布嚕特大頭目集陽伯克拏獲解營審辦訊係張逆緊要賊目該伯克庫布特既經此次獎諭

令其設法擒拏逆首拔達克山伯克密勒雅爾亦經長齡等獎其
來使仍令擒渠立功懋膺封賞固可期其認真出力其喀什噶爾
回子多列特胡達巴爾底自願以家屬爲質往拏張逆亦尙可信
惟此時止應令伊等自行設法擒獻無須兵力如能得有報獲逆
首確信再酌量派兵接應護解來營尙無不可至帶兵大員哈琅
阿等前已降旨分別施恩伊犁領隊大臣碩隆武因上年帶領伊
犁官兵行走遲緩本應革職治罪從寬責令圖功自贖此次隨同
出力功過僅足相抵仍遵前旨無庸給予議敘再前經武隆阿帶
往之山東開復知縣章寅續經程含章參奏該員虧短庫項降旨
革職拏問見在會否解往山東如尙未起解卽著長齡等迅速派
員押解前往歸案審辦又從逆伯克博巴克爲張格爾親信黨與
既帶叛回竄出卡外復由霍罕逃出糾約零匪二千餘人往尋張

逆經官兵在塔里克打坂地方截擊復敢迎拒傷我官兵將來生擒該逆時卽著派員押解來京盡法懲治以彰國憲再據御史錢儀吉奏稱此次南路辦理善後非增駐兵丁不足以壯軍威而官兵旣多難盡取給於回部自應倣照北路開設屯田喀什噶爾之東大河沿一帶傍烏蘭烏蘇河岸多有舊時溝渠遺迹且由此至阿克蘇又是捷徑可否於所調各兵內擇其曾在伊犁烏嚕木齊屯土種地者酌留數百名於大河沿一帶分築數堡使之居住俟交春令逐漸開墾所收糧石分貯喀什噶爾及阿克蘇兩城或於巴爾楚克地方建置倉廩尤爲適中之地南北聲勢亦足聯絡等語官兵留駐各城較前增多自應豫籌經久之策以供兵精該御史所奏屯田裕餉不爲無見第開墾新荒急切難以奏效前經該將軍飭查叛產爲數甚多見在會否清釐將來卽以查出叛產酌

留熟悉屯工種地兵丁分領耕種再將官荒地畝逐漸開墾未始
非邊備之一策惟議及屯田必須先籌水道其大河沿等處地方
是否舊有溝渠遺址此外能否另籌引水灌田潁洧著長齡等詳
勘妥議奏明辦理○癸丑以秋讞失出五起降多山以四品京堂
候補以保昌爲盛京刑部侍郎普保署左副都御史紉太僕○乙
卯命福珠隆阿以三品卿銜巡視兩淮鹽政以張青選爲湖北按
察使由兩淮鹽政遷○丙辰以孝穆皇后梓宮奉移寶華峪上詣梓

宮前奠酒○實授伊里布雲南巡撫○實授嚴烜河東河道總督

賞還二品頂帶○己未富呢揚阿丁憂以慶善爲浙江布政使衍

慶爲江蘇按察使由廣東南○庚申上啓鑒謁東陵○免經

過地方額賦十分之五○辛酉孝穆皇后梓宮至寶華峪暫

安於享殿○壬戌上謁昭西陵孝陵孝東陵景陵

裕陵○癸亥諭上年張格爾入卡滋事朕命將出師志在殲除元惡本年二月進兵天戈所指四城迅就蕩平惟逆首尙未弋獲朕思該逆荼毒生靈斷無久逃天網之理不值久勞師旅今出卡大兵全回大營各城辦事大臣俱經簡放一切善後事宜卽可及時經理喀什噶爾見有武隆阿誠端蘇清阿三人長齡無庸在彼督辦著卽來京供職伊犁將軍著德英阿補授伊犁參贊大臣著容安補授卽赴新任見除凱撤官兵外留防官兵尙多不可無大員統轄參贊大臣楊芳著暫留喀什噶爾所有一切善後事宜會同武隆阿等妥速辦理事竣聽候諭旨各要激發天良和衷共濟不准推諉並著四城大臣各就該城情形妥籌經久之策知會楊芳武隆阿等會同具奏其揚威將軍印信及武隆阿參贊大臣印信遇有大員入都之便俱著齎帶回京○甲子 上至 寶華峪

臨視 孝穆皇后奉安地宮奠酒畢回鑾○以 萬年吉地工程
堅固晉戴均元太子太師復英和一品頂帶○乙丑張青選緣事
降調以李文耕爲湖北按察使山東鹽運使遷○丙寅移湖北穀城縣
廟灘千總駐茨河范家寨外委駐廟灘○丁卯 上還京師○己
巳添設馬蘭鎮額外外委一○庚午程祖洛丁憂以楊國楨爲河
南巡撫陸言爲河南布政使御史遷○是月加賑陝西略陽縣
水災緩徵甘肅甯夏等三州縣山東恩縣等五縣新舊額賦河南
臨漳等十一縣災歉逋賦齊齊哈爾等四處前貸銀穀

冬十月癸酉朔河南巡撫程祖洛奏明巧宦焦芳明史列入閣黨
不知何時入祀泌陽縣鄉賢祠應請撤去得旨所辦是必須細心
酌覈毋得濫入○戊寅諭軍機大臣等德英阿覆奏查議伊犁至
喀什噶爾由草地行走道路情形一摺伊犁由特穆爾圖海北至

喀什噶爾草地不但較冰嶺一路平坦易行卽比之海南一路亦有樹木可供柴薪惟悔子南北全係布魯特遊牧地方尙須詳加查勘見值大雪封山難以行走著於明歲春融後德英阿容安二人內酌量一人親往履勘再行定議朕聞冰嶺迤西另有一路可通烏什更爲便捷惟久經封閉並著詳加躡度程站遠近行走難易是否亦有布魯特在彼遊牧能否於中途豫備馬匹接替更換一併體察情形悉心妥議奏明候旨○己卯諭清語騎射爲滿洲根本人所應習各省駐防滿洲人等原係由京分駐非綠營可比亦應一體習學清語昨據廣州將軍慶保等具奏甄別官員一摺竟用漢字書寫而請安摺亦用漢字成何事體廣州駐防官兵不下五千餘人豈無一寫清字之人乃慶保等於循例事件竟亦率用漢摺深染漢人習氣殊爲可笑若不加以整飭久之滿洲舊業

必致廢弛慶保巴杭阿花沙布俱著傳旨申飭並著曉諭各省將軍副都統嗣後如係人命詞訟以及奏銷錢糧數目等事尙可用漢摺陳奏其滿營循例應辦事件俱著以清摺具奏各省將軍副都統等其仰體朕意將所屬滿洲官兵教以清語騎射俾各精熟毋得漸染漢人習氣廢弛滿洲舊業○庚辰以甘肅應付兵差免嘉慶二十三年至道光五年通省民欠正雜銀兩○丙戌禮部尙書姚文田卒予祭葬諡文僖○以湯金釗爲禮部尙書潘世恩爲左都御史轉杜堦爲吏部左侍郎調辛從益爲吏部右侍郎以韓鼎晉爲工部右侍郎署禮部右侍郎○戊子以裕誠爲內閣學士兼禮部侍郎銜由副都統遷○調賀長齡爲江甯布政使以鍾祥爲山東布政使調李文耕爲山東按察使以尹濟源爲湖北按察使由四川成綿茂道○以吳光悅爲左副都御史周錫章爲湖北布政使姚祖同爲

廣東按察使

品候補四京堂

○己丑諭惇親王縣愷著先行退出內廷行

走其一切差使無庸管理宗人府宗令著奕紹補授所遺右宗正

員缺著尙格補授武英殿御書處著派穆彰阿管理暢春園事務

著縣偲管理○諭蔣攸銛等奏遵旨議覆海運事宜一摺各商船

運米應給水腳等項及一切經費除天津通州用款按照上屆章

程應動漕項銀兩湊撥濟用外其在南經費仍由各州縣將向來

辦漕貼費照舊支用如有不肖官吏借端浮勒著卽嚴參懲辦毋

稍姑容州縣運米前赴上海雇用民閒剝船著按照市價計日給

發毋許胥役人等封捉剋扣並著出示嚴禁有犯必懲其水手人

等著各船自行分給津貼俾船商與舵工水手相安無庸官爲限

制其船商得受耗米原以備盤量折耗及到津補償短絀之用著

嚴禁私行折價以杜短交兌米時務押令將耗米全數上船方准

開行其商船到津由海口挽至上園需雇緯夫見經該督等議定
各州縣於兌米時每米一石給船戶制錢四文作爲該船到津雇
夫工價並著直隸嚴飭地方官禁止緯夫擡價把持毋許延誤其
商船卸米窆土壓載著直隸地方官豫撥官地若干畝准令窆土
如有地棍把持情事立即嚴拏究辦其自津運通令經紀親押一
節前已降旨仍由直隸派委員弁分撥押運實力巡查毋許經紀
等訛索滋弊總期在南不至以津貼病官以徵收擾民在北不至
以刁難累商以剝運傷米方爲妥善○庚寅諭昇平署太監苑長
青脫逃潛匿一案悖親王於該太監私投入府理應卽時送交內
務府照例治罪乃任其潛匿直至該衙門行文傳提尙不卽行交
出轉令人帶出冀圖掩飾見經內務府將該太監拏獲究訊明確
據實具奏所有案內人犯除由該衙門按律定擬外悖親王狎比

匪人不自檢束著交宗人府嚴加議處○癸巳諭惇親王縣愷從前在上書房時於文史弓馬全不留心狎比便佞不喜正言 皇考仁宗睿皇帝暨 聖母皇太后屢加訓誡罔知悛改朕御極後篤展親之誼將伊晉封親王念其年逾三十冀可諳習時事近年派管旗務並補授宗人府宗令每於召見時所以教導者剴切周詳無微不至乃伊習與性成不自檢束前曾與太監張明得私相往來旋因張明得在昇平署當差不能常往復起意令將太監苑長青展轉引出於上年冬閒誘令在府藏匿實屬膽大妄爲迨經發覺內務府行文該王府提傳尙以府中並無苑姓太監枝梧聲覆直至眾供確鑿不能再匿又私令舒凌阿將苑長青帶至清河地方作爲九月閒逃走希圖掩飾是誠何心本日據宗人府議將伊革去王爵固屬咎所應得但朕心究有所不忍縣愷前經降旨

退出內廷行走並革去一切差使著加恩降爲郡王此係朕小懲大誡望其改過自新縣愷宜倍知感愧加意檢束諸事小心無負朕教誨成全至意若仍任意妄行復萌故態朕必執法嚴懲不能再邀寬貸也○免哈密回民春借麥石○乙未諭本日朝審句到有官犯斌靜色普徵額二起斌靜前在喀什噶爾參贊大臣任內行止不端失於撫字經刑部會同宗人府照激變良民律問擬斬候色普徵額在喀什噶爾幫辦大臣任內逆回張格爾入卡追至霍爾罕莊逗留不進貽誤事機經刑部照失誤軍機問擬斬候該犯等罪狀若係卽時發覺朕必執法從事決不寬貸惟事隔數年並無實在證據該犯等在部亦未經取有確供罪疑惟輕俱從寬免句斌靜著宗人府永遠圖禁色普徵額著刑部永遠圖禁以示朕法外施仁至意○辛丑諭賀長齡奏親母年逾七旬請於湖南

近省量予更調等語所奏雖係實情但各省藩臬經朕簡任原期人地相宜若紛紛奏請或竟有心規避亦不可不防其漸賀長齡見調江甯布政使已較山東爲近著卽赴新任所奏不准行○是月賑湖北江陵監利二縣及屯坐各衛水災給奉天廣甯縣被水站丁口糧貸山西定襄潞城二縣旱災霍災倉穀黑龍江墨爾根城歉收口糧緩徵安徽壽州等二十二州縣及屯坐各衛湖南澧州安鄉縣水災新舊額賦直隸冀州等十一州縣逋賦貸糧江蘇高郵等二十五州縣衛被水賦課並太倉等十州廳縣衛節年銀米湖北沔陽等十五州縣被水額賦

十一月癸卯諭前因英和面奏步軍統領衙門番役緝捕得力曾經降旨凡番役子孫准其應試武場出仕武職仍不准由文途考試出仕以示限制茲據御史沈巍等奏番役入仕及番役子孫應

試請仍改歸舊制等語番役專司緝捕原與各項執役人等無異
從前嘉慶年間節經欽奉 皇考仁宗睿皇帝諭旨番役中得過
頂帶者止准暫用頂帶不准實缺補用其子孫不准選用官職此
後亦不准再行應考等因仰見我 皇考激敘官方慎重名器之
至意該番役投充之初原不問其身家清白與否一經准其出仕
則凡身家不清者或藉此爲進身之階不可不防其漸此等人役
畀以戎行重任既非素習操防亦復難資表率嗣後番役人等除
著有勞績特旨獎賞錄用外該番役及其子孫均不准應試武場
出仕武職以符舊制而清流品○乙巳諭前因蔣攸銑等會奏請
將蘇松等四府一州仍用海運不許盤壩嗣後該督又單銜具奏
請酌量少留數幫經朕嚴飭軍船全數歸次不准一幫暫留因該
省已雇備海運船隻是以姑允所請朕意實有未愜茲據該督奏

稱糧船歸次並不爲遲仍可修脩出運其海運沙船儘可給還承攬聽其另裝商載所有蘇州松江常州鎮江太倉四府一州請仍照常河運等語以本年河湖情形而論海運本不必行原應如此辦理該督久任封疆自應確有把握何竟茫無定見一至於此若非朕屢加駁斥恐該督尙不免仍執前說也見在海運沙船僅據投具承攬船價均未給領其船商應雇水手及添置篷索什物均未受雇置備所有前議海運著卽停止其蘇松常鎮太倉四府一州仍著照常河運至攔黃埕以內清水塘河底會淤必須大加挑挖張井等勸挑塘淤務須格外加深以免重運阻滯並著漕運總督訥爾經額選派押運幫弁僉丁修船趕緊受兌江蘇巡撫陶澍查照妥爲經理毋誤兌運其安徽浙江江西湖北湖南各督撫仍遵前旨將起運新漕督飭各糧道早兌早開總期於四月初十日

以前全數趨至清江剋期抵壘以便渡黃毋許延誤將此通諭知之○諭軍機大臣等長齡等奏探明首逆確蹤分飭截擊防堵一摺張格爾竄赴庫蘇地方聞擊逃至阿坦台等處意欲糾合各布魯特再來搶喀什噶爾並搶烏什卡倫阿坦台等將張逆留住又據奇里克受滿布魯特比薩底伯克等願往托古托斯羅設法擒擊此等情節俱不可盡信惟該夷犬羊成性難保不隨同附和薩底伯克等或以報信爲名探我虛實均未可定自應周密嚴防長齡等賞給銀牌等物諭令擒獻並遣色星額等由彼確探嚴諭阿坦台等兼諭烏什布魯特截擊所辦俱是達凌阿尙未行抵阿克蘇卽著折回帶烏魯木齊官兵四百五十名並留防阿克蘇官兵五百名赴烏什駐紮並著移咨德英阿遣協領前赴哈薩克阿布諭令協力截擊又另摺奏善後事宜大槩情形所請喀什噶爾另

建城垣在迪南二十餘里之喀喇哈依地方已於九月興工並將
逆產銀八萬三千六十兩撥用俱著照所奏辦理惟所稱英吉沙
爾葉爾羌二處另築新城建蓋兵房衙署情形殊未明晰著各該
大臣勘定分別辦理由長齡分晰具奏所請一切科派陋規永遠
革除不准藉端攤派譯寫簡明告示張貼並著勒石以垂久遠係
必應查辦之事至留兵一萬八千名自係未經接奉前降諭旨著
俟長齡等覆奏到時再行覈辦再前此諭旨內巴爾楚克未准駐
兵惟查此地係葉爾羌前往阿克蘇要路著長齡等酌量是否應
留弁兵駐守據實具奏所奏大河拐一帶屯田及裁撤卡倫侍衛
改設綠營備弁兩條著大學士軍機大臣會同兵部議奏所請口
外田地不能科畝房屋俱係土築難照內地造冊報部著照所奏
辦理其新城東南建築土堡駐紮伊犁滿兵並將所占新城回子

莊田俟叛產撥還並每戶賞給銀兩以爲遷移之資俱著照所請
行前因四城辦事大臣俱經簡放有人是以降旨令長齡回京供
職見在武隆阿患病開缺所有一切善後事宜應辦者甚多長齡
著暫緩來京督同楊芳等悉心辦理如已啓程卽行趕緊折回禮
部新鑄喀什噶爾參贊大臣印信著附便發去長齡等轉飭該參
贊祇領○丙午諭蔣攸銑等奏已革河工通判呈請捐復原官一
指南河已革中河通判萬承紫前因承辦工程草率經該河督等
奏參革職茲該督復以該革員年力未衰在工素稱勤奮奏請捐
復原官實屬先後矛盾若准其所請則辦公草率之員尙復何所
儆畏所請將萬承紫捐復通判原官仍留南河差委之處著不准
行○庚戌予那彥成欽差大臣關防馳往喀什噶爾會同長齡等
辦理善後事宜以屠之申署直隸總督由布政使署○甲寅飭禁丁憂

人員毋許逗留他省並投效河工軍營○乙卯諭軍機大臣等前因各城辦事大臣俱經簡放是以降旨令長齡回京供職旋因武隆阿患病復降旨令長齡暫緩來京如已啓程卽趕緊折回喀什噶爾並因長齡偶患脾瀉復令那彥成作爲欽差大臣會同長齡辦理一切善後事宜茲據長齡奏四城雖復服志未定該逆竄至托古托斯羅地方難保不復萌故智請暫留軍營督辦等語所奏甚是長齡著仍遵前旨在喀什噶爾辦理一切其揚威將軍印信卽著留彼鈐用那彥成到彼尙需時日其一切善後事宜應辦卽辦不必等候至張逆見竄阿坦台汰劣克愛曼距烏什較近前已降旨令達凌阿折回赴烏什駐紮會同多貴督兵嚴防並著長齡移咨德英阿遣協領前赴哈薩克阿布拉諭令協力截擊儻接據卡外探報卽速奏聞○戊午裁回疆額設守卡侍衛三十員○乙

丑裁貴州普安廳屬土守備平遠州屬土把總○己巳以回疆凱撤官兵過境免奉天遼陽等七廳州縣地丁銀十分之四○庚午諭英和奏熱河都統衙門事務較繁向於辦事理藩院刑部司員外酌派參領佐領一二員幫辦並非奏案亦無定額見復新定章程旗民案件均歸都統衙門審辦該參領佐領駐防年久迹涉嫌疑委令聽斷易滋物議惟案牘較前加繁數倍請派刑部主事一員前往等語著照所請除向例應派實缺司員外再於刑部候補主事內揀派熟悉刑名者一員前往幫辦不可以無能者充數如果始終奮勉三年期滿由該都統出具切實考語送部引見量予補缺以示鼓勵所有舊委刑司兼行之參領佐領等卽行裁汰其向設筆帖式二員專令繙清譯漢不准干預案件○辛未申禁武職衙署僕役濫占名糧○是月賑甘肅岷州等六州縣水災雹災

援徵岷州等八州縣江西南昌新建二縣水災額賦江蘇太倉等三十州廳縣衛通賦

十二月壬申朔諭吏部具題山東省大計卓異本內新城縣知縣容曷一員該護撫賀長齡原註惻惻慈祥考語爲政之道貴在勸懲得中若曲徇輿情槩從寬厚勢必至水懦民玩姑息養奸地方官職司民牧總須審於寬猛相濟之理遇事知所操縱豈因一意慈祥遽爾列爲上考直省督撫當於屬吏中體用兼備熟明治理者登之薦牘固不可任武健嚴酷之吏爲害閭閻亦不可長異悞優柔之習稍形廢弛特通諭各督撫等知之○甲戌命嗣後新疆地方遇有懷挾私讐殺害本管官之案請旨卽行正法○丙子諭軍機大臣等長齡等奏卡外稟報張逆近日情形及見在籌辦一摺張逆聞大兵陸續撤回膽敢分遣回子向各愛曼借兵借糧意

欲仍來搶占喀什噶爾可見狼子野心雖竄敗遊魂仍敢覘我虛實該將軍前次虛延月日一無措置豈未慮及此耶阿坦台等稟稱張逆跟隨二百餘人不敢下手見在給伊搬至伊里斯滿底處再來稟知前往掩拏顯藉投稟爲名打探官兵數目該將軍面加諭斥並譯發回字諭帖尙爲得體前已降旨留兵一萬八千名並令那彥成爲欽差大臣趨程前來會辦一切該將軍卽照所留兵數分派駐紮要隘星羅碁布嚴密防範斷不可輕率出卡致有疏虞所有善後事宜應辦卽辦不必等候那彥成到彼致延時日○辛巳敕諭哈薩克阿拉布曰據伊犁將軍德英阿等奏接據揚威將軍大學士長齡咨稱探明張格爾要由布魯特哈薩克路徑逃往布噶爾之信卽發諭帖給阿拉布務將張格爾圍住以便官兵督同拏獲據阿拉布稟稱今年秋收後有霍罕伯克帶人在皮斯

格克築城寄信哈薩克前去遊牧並允從情願擊獻張格爾差台
吉伊賴里與將軍遞馬等語情詞恭順具見惻誠自爾祖父投誠
天朝世篤忠貞甚爲出力朕所深知爾遊牧地方距霍罕甚近霍
罕帶人在皮斯格克築城爾能深明大義不肯前往朕甚嘉焉茲
頒賞蟒袍一襲大段四匹用昭優賚霍罕狡譎性成恐此後仍不
免多方引誘爾須持以定見不爲所愚庶不至受其盤剝自貽後
悔爾當督同部落人等安居樂業不可輕易更動儻張格爾竄至
附近地方爾能偵獲縛送伊犁朕必照賞格賞爾元寶三千錠晉
封爾以王爵永承恩眷延及子孫爾既受茲寵錫益當感恩出力
永爲天朝屏翰仰副朕撫遠綏來至意○丙戌以吉恒爲四川按
察使○乙未召福縣來京調松廷爲倉場侍郎保昌爲兵部右侍
郎誠端爲盛京工部侍郎

署左副都御史

○己亥辛從益以病免調白鎔

爲吏部右侍郎以申啓賢爲工部右侍郎由內閣學士遷○是月緩徵江蘇海州等三十一州縣衛水災舊欠額賦○是歲朝鮮琉球暹羅來貢○會計天下民穀數各省通共大小男婦三萬八千三百六十九萬六千九十五名口各省通共存倉米穀三千一百五十五萬二千七百六十九石二斗四升四合八勺